

محمد سعيد الصغار

محنة  
محمود السامح

نصوص مسرحية



اهداءات ٢٠٠٢

دار المصطفى

سوريا

محنة محمود الشاهد  
حواريات و نصوص مسرحية





---

التصميم ولوحة الغلاف والخطوط :  
للمؤلف - ١٩٩٧

---





# محنة محمود الشاهد

## حواريات ونصوص مسرحية

- محنة محمود الشاهد
- يا غريب اذكر هـَاك
- سهرة كاس عراقية
- داس طاوولي

١٩٩٧

مَشُورَات





# محنة محمود الشاهد

١٩٩٧



شخص	محمود الشاهد	○
	المربع الاسود	■
	المربع الابيض	□
	الدائرة السوداء	●
	النجمة	*

الزمان : زماننا  
المكان : أي مكان



(١)

مكتب مسؤول كبير  
إطار لوحة فارغ كبير خلف المكتب  
○ محمود  
■ المربع الاسود

- أرايت هذه اللوحة ؟  
○ أراها .  
■ أتعرف من رسمها ؟  
○ طبعاً ؛ هذه من لوحات سليم المعروفة .  
■ هل كنت تعرفه ؟  
○ شخصياً ، لا . ولكنني كنت أتابع معارضه .  
■ أنا لا أعرفه ، ولكنهم يقولون إنه كان يجيد  
العزف على الغيتار .  
○ هكذا سمعت أنا أيضاً .  
■ ويقولون إنه كان يحفظ ألف قصيدة عن ظهر  
قلب .  
○ ألف قصيدة ؟!  
■ ما وجه العجب ، هناك من يحفظ ما هو أكثر .

- يا للذاكرة الراسخة ! ■
- أبي مثلاً ، كان يحفظ ديوان شاعر المدينة  
وديان الشاعر الغريب من الغلاف إلى الغلاف . ○
- يا للذاكرة الراسخة ! ■
- وأنت ، ألم تحفظ شيئاً من الشعر ؟ ○
- أنا ؟ طبعاً طبعاً . كنت ناصع الذاكرة ؛ كنتُ  
أحفظ القصائد المدرسية في الدرس نفسه . ■
- وغير ذلك ؟ ○
- حفظت كثيراً من قصائد الشعراء المعاصرين . ■
- مثلاً . ○
- لم أعد أذكر . ■
- ألا يبدو لك الأمر غريباً أن يحفظ سليم ألف  
قصيدة ولا يكتب الشعر ؟ ○
- غريب فعلاً . ■
- أيكون قد وصل إلى هذا المستوى في الرسم  
بفضل الشعر وحب الموسيقى ؟ ○
- ليس بالضرورة . ولكن الخزين المعرفي يتفاعل  
فيما بينه ، ويطور بعضه بعضاً ، لا شك في ذلك . ■
- ولكن ألف قصيدة يا أخي ؛ ألف قصيدة !



- يا للذاكرة الراسخة !
- أتصدق أنت ذلك ؟
- لا أدري .
- يقولون إن أحد الخلفاء الأمويين دعا أحد رواة الشعر ، وكان يُسمّى (الراويّة) لكثرة حفظه ، وسأله : لماذا سُميتَ بالراويّة ؟ فقال : لأنني أحفظ من بين ما أحفظ سبعمئة قصيدة على قافية واحدة . فقال له : إقرأ . فراح يقرأ حتى نعس الخليفة فأوكل به من يعد تلك القصائد .
- كان خاليّ البال ، لا شغل له إلا الحفظ والرواية .
- أتظن أن خلو البال هو السبب ، أم إنها الموهبة ؟
- لا أدري .
- كيف لا تدري ؟ أتظن أن هناك إنساناً خليّ البال ؟
- ربما . أنا ما كنت خليّ البال .
- أنا أراها موهبة .
- يمكن .

- وما يحيرني في أمر سليم أنه يحفظ ألف
- قصيدة ولا يقول الشعر . كيف تفسر ذلك ؟
- لا أجد تفسيراً .
- وكم من اللوحات رأى ورسم حتى وصل إلى
- هذا المستوى الرفيع ؟
- لا بدّ أن يكون كثيراً .
- كثيراً جداً .
- ما يوازي ألف قصيدة ويزيد .
- لا بدّ أن يكون الأمر كذلك .
- حتماً . ولا بدّ أن تكون البقع البيض المتكررة
- في لوحاته ، كما في هذه اللوحة (يشير إلى
- إطار اللوحة المعلق على الجدار) ذات دلالات
- هامّة .
- البقع البيض ؟
- نعم ، هذه البقعة البيضاء ، ألا تراها ؟
- أهي بيضاء ؟
- طبعاً ، إنها بيضاء . لا عليك من هذه المسحة
- الصفراء الغالبة عليها . أنعم النظر فيها ،
- وانسَ الأصفر ، انسَ هذه البقع الرمادية

- الصغيرة المتداخلة في الأصفر ؛ تجدها بيضاء .
- لكن . . .
- لكن ماذا ؛ أتشكو من بصرك ؟
- لا ، ولكن المسحة الصفراء هي الغالبة .
- قلتُ لك إنسَ الأصفر ، وحاول التقاط البياض
- الموجود في اللوحة .
- سأحاول .
- خذ الأمور على ما تبدو عليه . لا داعي للتعنّت
- والتشبّث بالمقولات الثابتة . الألوان مثل بقية
- الأشياء ، نحن الذين نمناها أبعادها ، ونعيد
- صياغتها ، ونحدد الاحساس بها .
- هذه بقعة بيضاء ، دعك من اللون الأصفر
- واللطخات الرمادية ، إنها بيضاء . أتراها الآن بيضاء
- ليس تماماً .
- إنها بيضاء .
- لا بدّ أن تكون بيضاء ، وإن كانت عيوني كليلّة لا
- ترى الأبيض فيها .
- ستراه إذا أنعمت النظر . تأمل جيداً .
- سأحاول .

- ولا بدّ لهذي البؤرة البيضاء من دلالة هامة .
- ربما يكون الأمر كذلك .
- حتماً . ولا بدّ أن تكون إشارات إلى شيء
- ما . ولكن كيف الوصول إلى هذا الشيء ؟
- هذا ما يحيرني . الفنانون يدسون أحياناً
- دلالات خفية تستعصي على التفسير ،
- وعندما تسألهم ، يقولون : لا ندري ، إنها
- حالة تشكيلية ، لا تكتمل اللوحة إلا بها .
- يمكن أن يكون الأمر كذلك .
- ويمكن أن يكون غير ذلك .
- كيف ؟
- يعني أنها مراوغة ؛ أي أنها إشارة مقصودة
- مدسوسة في اللوحة وليست حالة تشكيلية
- مثلما يدعون .
- لا أدري ١
- كيف لا تدري وأنت الرسام والناقد ؟!
- لا أتذكر .
- الرسم أصعب على التفسير من الشعر . في
- الشعر تستطيع أن تقتنص الدلالة من خلال

- الألفاظ وفنون البلاغة ، أما اللوحة فلا  
تستطيع الظفر بما تريد من خلال اللون  
والتكوين وعناصر العمل المتداخلة .
- هذا صحيح .
- وهذه البؤرة البيضاء في لوحة سليم ، لماذا  
تتكرر في لوحاته ؟
- ربما تكون دلالة على شيء غائب يشير إليه .
- مثلاً ؟
- مثل الأمل ، الفرح ، الحب . لا أدري ؛ شيء  
راسب في ذاكرته .
- وكيف يمكننا الوقوف على ذاكرته لنعلم ما  
يرمي إليه ؟
- ليس بالضرورة أن نفتح ذاكرته ونبحث  
فيها ؛ ولكن المهم أن نعرف معايير العمل  
الفني ، ونرتب أذواقنا على التعامل معه .
- وهل من الضروري أن نعرف تاريخ الفن  
ومدارسه وأساليبه لنفهم لوحة فيها نقطة بيضاء ؟
- لا ، ولكن اتساع المعرفة ، والمتابعة وارتداد  
المعارض يساعد على الاقتراب من العمل

- الفني وتذوّقه .
- ولكن ذلك يتطلب وقتاً طويلاً .
- حتماً .
- إذن كيف ؟
- لا أدري . الموضوع الفني وعبر المسالك .
- هذا ما أقوله . وأقرب الموارد هو رصد ذاكرة الفنان ، والدخول من أبوابها إلى اللوحة .
- ولمّ كل هذا العناء ؟
- لتذوّق العمل الفني ، وإلا نبقى خارج حدود الثقافة .
- . . . . .
- ألف قصيدة ، ألف بؤرة بيضاء ، ألف اهتمام . أية ذاكرة معقدة !
- يا للذاكرة الراسخة !
- اترك هذه العبارة ، ليس هناك ذاكرة راسخة ، هناك ذاكرة فحسب ؛ ذاكرة تتقبّل ما نريده لها ، ذاكرة طيّعة مرّنة لا تتعارض مع الواقع .
- لم يخطر ذلك على بالي .

- أخطر ما في الانسان ذاكرته .
- كيف ؟
- لأنها تشده إلى ماضيه ، وتعرّ عليه لذة الاستمتاع بواقعه .
- وإذا لم يكن واقعه ممتعاً ؟
- الانسان القوي يتلمّس المتعة في ما هو موجود .
- والضعيف ؟
- ينخسف أمام الواقع ، يتشبّث بذاكرة الماضي ، يتخلف عن الركب . . إلخ .
- أليس كذلك ؟
- لا بدّ أن يكون الأمر كذلك .
- إذن لا بدّ من أن يكون الانسان قوياً بما يكفي للتعامل مع الواقع .
- وإذا لم يكن بهذه القوة ؟
- علينا أن نساعد ونكشف مواطن قواه الخفية ، ونعاونه على تقبّل واقعه . أليست هذه مهمّة الناقد ؟!
- أترى ذلك سهلاً ؟

■ ربما لا يكون سهلاً تماماً ، ولكن مهمة الناقد  
أن لا يترك الفنان يهرب من واقعه .

ظلام تدريجي يخفي وجود المربع الاسود  
ويُبقى محمود وحده في مركز الضوء .

محمود في ما بينه وبين نفسه (بانخدال) :  
بيضاء ؛ يقول إنها بيضاء ! أين البياض ؟ لقد  
أربك بصري ، وليّف دماغي . عشرون يوماً وأنا  
استمع إلى هذه الاسطوانة المدمّرة ؛ لعنة الله على  
سليم وعلى لوحاته !  
لتكن بيضاء !

وماذا إذا كانت بيضاء ؟  
بيضاء . . بيضاء ، إلى جهنم !  
ولكن ما الذي يمنع فعلاً من أن تكون بيضاء وأنا  
أراها صفراء مشوبة بالرمادي ؛ ألسنا نحن الذين  
نحدد الاحساس بالألوان مثل بقية الأشياء !  
ألم نتعلم أننا إذا وضعنا على صحن لونا إلى  
جنب لون وأدرنا الصحن بسرعة ، تبدو كل  
الألوان بيضاء ؟!



يا إلهي ! لماذا لم أفكر في إمكانية كونها  
بيضاء ، لماذا هذا التشبث بالثوابت ؟ والعجيب أنه  
هو أيضاً يسميها ثوابت ، ويرى أن الثوابت  
تتحرك .

فعلاً ؛ لماذا لا تتحرك ؟ وما أهمية ثباتها ؟  
الذرة التي هي وحدة الوجود تتحرك ، فما معنى  
الثوابت ؟

الجاحظ يقول إن العرب يسمّون الخبز والتمر  
الأسودان ، ويسمّون الخبز واللبن الأبيضان ؛ يعني  
إنهم يجعلون الخبز مرة أسود ومرة أبيض .  
يا إلهي ، كيف غاب عني كل هذا طيلة  
عمري ؟!

إنها بيضاء مثلما قال الاستاذ ، انتهينا !  
ولكن لماذا تتكرر هذه البؤر البيض في أعمال  
سليم ؟ لماذا لم أسأل سليم عن هذا عندما كان  
حيّاً ؟ لقد كنا نبحث في أدقّ الأمور ؛ نجادل ،  
نفسر ، ننقد ، نكتب ، نسهر ، نسكر ، وأسمع  
منه كل ليلة عزفاً جميلاً على الغيتار ، ولم أسأله  
عن هذه البؤر البيض .

بقع بيض ، وألف قصيدة يحفظها غيباً ، ويعزف  
على الغيتار . يا للموهبة الخارقة !  
ألف قصيدة !

أنا نسيت كل ما حفظته في حياتي ، ذاكرتي  
خَلَّتْ ، صارت بيضاء ، فارغة مثل وعاء مثقوب .

(ظلام)

(٢)

في بيت الدائرة السوداء  
غرفة بسيطة بأثاث متواضع ، على الجدار لوحة شعبية

محمود والدائرة السوداء

- الجو حار ، أليس عندك مبردة ؟
- ما عندي سوى المروحة . أدرها نحوك .
- لا جدوى فالهواء حار .
- ضع قليلاً من الثلج في كأسك .
- أنا أنضح عرقاً ، والخمر يزيد إحساسي بالحرارة .
- كأنك من مواليد القطب الشمالي . هذا بيتي وتعرفه من عشرين سنة .  
نخبك !
- شكراً . (يتطلع إلى الحائط) : أمس كنتُ عند وكيل الوزارة ، ورأيت عنده نسخة من لوحة سليم هذه .

- أي لوحة ؟
- هذي .
- هذي ليست لوحة سليم .
- بلى ، إنها لسليم .
- ولكن أنت خير من يعرف سليم ولوحاته ،
- وهذه نسخة من لوحة شعبية تباع في المكتبات .
- إنها لسليم ، لقد تكلمنا عنها أمس طويلاً .
- أنت تعني هذه اللوحة ؟
- نعم هذه اللوحة . وتحدثنا عن دلالة النقطة البيضاء فيها .
- أي نقطة بيضاء ؟
- هذه التي في اللوحة .
- أي نقطة بيضاء ؟ ربما تكون رأيت غيرها .
- كلا . إنها اللوحة بعينها .
- ولكن ليس في هذه اللوحة أية نقطة بيضاء .
- هو الذي لفت انتباهي إلى وجود نقطة بيضاء فيها .
- وهل ترى فيها الآن نقطة بيضاء ؟

- نعم .
- هل تشكو من بصرك ؟
- كلا . لقد فاجأني بأنه يعرف الكثير عن سليم . أنا شخصياً لم أكن أعرف أن سليم كان يحفظ ألف قصيدة ، ويعزف على الغيتار .
- يعزف على الغيتار صحيح ، وأنت كنت تعرف ذلك ؛ ولكنه لا يحفظ ألف قصيدة . إنه صديقك وتعرفه جيداً .
- فعلاً ؛ ولكنه قال إنه يحفظ ألف قصيدة ، يا للذاكرة الراسخة !
- أنت الذي كان يحفظ الشعر ، أنت الذي كان يلقي قصائده بحضور سليم ، فيأخذه الطرب ويعزف ويقول : أعد ! وكنت تصول في الغرفة قافزاً فوق الأرائك ، فاتحاً ذراعيك ، متهدج الصوت ، غارقاً في النشوة ، وكلنا نصغي إليك ونطلب المزيد ، ألا تذكر ؟
- لا ، سليم هو الذي كان يقرأ .
- يا عزيزي ، سليم يتذوق الشعر ولكنه لا يحفظ ، ولم يكن يقرأ في حضورك ، لم

يكن أي منا يقرأ عندما تكون موجوداً ،  
أنت ديوان الشعر الحي ، أنت الذي يمنح  
الكلمات حرارتها عندما تقرأ .

○ كان يحفظ ألف قصيدة ؛

يا للذاكرة الراسخة!

● من أين جئت بهذه الألف قصيدة ؟ هل هناك

من يحفظ مئة قصيدة في زماننا ؟ عُد إلى  
نفسك يا أخي ، وتذكر أيامنا ، راجع ما كنت  
تكتبه عن سليم في جريدتك .

○ لا تذكرني بالجريدة ! لا أريد أن أستعيد

أخطائي بعد أن اتضحت لي الأمور .

● اتضحت أم غامت ؟

○ (مستفزاً) أنا مقتنع تماماً بما أقول .

● كيف لي أن أعيد إليك ذاكرتك .

○ لا تحدثني عن الذاكرة ، أخطر ما في

الإنسان ذاكرته .

● وأروع ما فيه هذه الذاكرة .

○ لا . . لا ، إنها تشد الإنسان إلى الماضي

وتسلبه لذة الاستمتاع بواقعه .

- وإذا لم يكن هذا الواقع ممتعاً ؟
- الانسان القوي يتلمّس المتعة في ما موجود .
- هذا غريب . أنت الذي كنت تكتب وتقول :  
إن الذاكرة هي أثمن ما عند الإنسان ، لأنه  
يعادل بها اختلال الواقع ، ويلوذ بها عندما  
يتعذّر قول الحقيقة .
- هذا غلط . أنا لم أقل ذلك .
- بلى يا محمود ؛ أنت الذي قلت ذلك ،  
وأنت الذي كان يحفظ العديد من القصائد ،  
وأنت الذي كنت تقفز بيننا وتقرأ بصوتك  
الرتان :

- قفي قدمي إن هذا المكان  
يضيع به المرء عن حسّه  
رمالٌ وأنقاض صرح هوت  
أعاليه تبّحث عن أسّه  
أقلب طرفي به ذاهلاً  
وأسأل يومي عن أمسه
- لا أدري عماذا تتحدث ، لا أتذكر شيئاً مما  
تقول . لمن هذا الشعر ؟

- لعمر أبو ريشة الذي كنت تحفظ ديوانه كاملاً .  
أنا لا أحب الشعر العمودي .  
ولكنك كنت تكتبه .  
كان ذلك أيام المراهقة . لا أحب الشعر العمودي ، لا أحب الشعر أصلاً ؛ بل أنني ، إذا شئت الحقيقة ، لا أحب الأدب .  
عجيب !  
نعم . الأدب هراء . الصحافة هي الأساس ، لأنها أقرب إلى الجماهير . في الصحافة تعيش الحدث ، تتفاعل معه ، تكتفه ، وأحياناً تخلقه خلقاً وتدعو الجماهير إليه . الصحافة تعطيك إحساس القائد ، أما الأدب فهو للكتب والمكتبات .  
لا أفهم شيئاً .  
أنت مشدود إلى مقاييس ومعايير عتيق عليها الزمن ، ولذلك لا تفهم شيئاً . أنت خارج الواقع ، لذلك لا تحسن التعامل معه وتكتشف متعته .



- وهل أنت مستمتع بما أنت فيه ؟
- هذه مسألة تعنيني ، أنا أتعامل معها في حدود قدرتي وقناعاتي ، ولا أريد من يدلني على طريقي .
- والله لا أدري ماذا أقول لك ، لأنني لم أعد أعرفك ، أفكارك جديدة عليّ وعليك ؛ ربما يحسن بنا أن نبدأ تعارفنا من الآن .
- هذه خطوة نحو الواقع .
- المشكلة هي أنني لا أرضى بهذا الواقع ، لا أستطيع أن أمحو ذاكرتي .
- أخي ؛ لماذا تظن أن الذاكرة من الحقائق الكلية ؟ الذاكرة قميص ، يبلى فتستبدل به سواء ، هذا هو الواقع .
- هكذا ؟
- نعم هكذا . أين سليم ؟ أين الألف قصيدة ؟ أين البؤر البيض ؟ كلها راحت ، استقرت في ذاكرة لا تقوى على مواجهة الواقع ، فلماذا التشبّث البائس بأمور لا جدوى فيها ؟
- محنة !

- طبعاً محنة . ولكنها من خلقكم . أنتم ناس  
طوباويون تتحدثون عن السلام في وقت  
السلام ، وعندما تقوم الحرب لا يعرف  
أحدكم ماذا يفعل . ملجأكم الوحيد هو  
الترنم بأمجاد الماضي ، والنواح على غيابه .  
● لكنها ليست حريتنا .
- أنت تدري أنها حرب لا مبرر لها ، ونحن  
نتحدث عن السلام لكي نضم أصواتنا إلى  
من يحلم بإنقاذ البشرية من المهالك .
- ولكنها حرب قامت ، والوطن مهدد بالدمار ،  
والوطني من يشارك فيها .  
● الوطني من يسعى لإيقافها .
- أليس هذا ما كنتَ تدعو إليه ؟
- لماذا تهددني بالماضي ، وتحاول شدي إليه ؟  
أنا الآن أمامك بهذا الكيان ، خذني كما  
أنا ، واضحاً بأقوالى وقناعاتي . لماذا لا تحاول  
أن تصحو أنتَ أيضاً وتحرر من ثوابتك  
البالية ؟!

(ظلام تدريجي)

(٣)

بيت المربع الابيض  
غرفة متواضعة بأثاث بسيط .

الدائرة السوداء  
المربع الابيض

● (يقرأ في الجريدة) :

» . . . ولنلا يتوهم القاريء أن ما يدّعيه  
بعض الكتاب هو الحق الذي لا حقّ بعده ، نقول :  
إن مشكلة الأهوار مشكلة تاريخية ، وإن التخلف  
الذي عاشه أسلافنا حجب عنهم رؤية الحقيقة الماثلة  
أمام عيوننا ؛ وهي أن هذه الأهوار آفة بيئية تنشر  
الأمراض ، وتفتك بالمواطنين ، وأن خطة تجفيفها  
هي خطة حضارية . . . » .

● يا إلهي بماذا يهرف هذا الرجل ؟ أتصدّق أن  
محمود هو الذي يكتب هذا ؟

□ لقد كتب ما هو أعجب ، والمخيف أنه مقتنع  
تماماً بما يقول .

- أنتظن ذلك ؟ □
- نعم ؛ لقد دخلتُ معه في مناقشات طويلة لا تخلو من حدة ، فوجدته مؤمناً بما يقول .
- من أين جاءه هذا الإيمان ؟ لقد قضينا معه عشرين سنة لم نسمع منه إلا ما هو ضد ما يكتبه الآن ؛ أي إيمان هذا ؟ إنه يمّوه الحقائق ، ويلوي أحداث التاريخ ، ويريدنا أن نصدقهُ . □
- هو لا يهتم بتصديقك ، لكنه يؤسس لوضع جديد ، لنفسه وللجيل الجديد . ●
- وهل تظن أن هذا الجيل سيصدقهُ ؟ □
- قلتُ لك إنه لا يهتم إن صدّقته أو كذّبته . همّه أن يبقى حيث وضعوه . ●
- ولكنه لن يبقى هنا طويلاً ، سيُنْبَذ كأَي ثوب مُسْتَهْلَك . المشكلة هي مشكلة هذا الجيل ، كيف ستجري به الأمور ؟ □
- عندما يكون هناك خمسة مفكرين مثله يملأون صحافة البلد بهذه الأفكار ، ماذا تظن ؟ ●
- أظن أننا على حافة الهاوية . □
- والمشكلة ليست هنا ؛ المشكلة هي أن

الحقيقة الآن ذاهلة ، تائهة ، تشبه بيتاً  
مفتوح الأبواب والنوافذ ، والريح تأتيه من  
كل مكان .

● هذه مسألة إيجابية .

□ دعني أوضح ؛ الريح تدخل من نافذة  
وتخرج من نافذة أخرى ؛ تدخل من نافذة  
وتخرج من الباب ، فهي تائهة في الفضاء ،  
لا مجال لها للاستقرار ، كل ما يدخل البيت  
يخرج من منافذه . هذه مسأله أولى .  
والثانية ؛ هي أن الحقيقة عندما تُذهل يمكن  
أن تُقصى وتُحشى بالكاذيب .

● ولكن للحقيقة ثباتها ، فكيف تُذهل ؟  
□ تُذهل مثلما يُذهل الرجل العاقل عندما  
يصاب بلطمة قوية ، وإذا توالى عليه  
اللطومات ازداد الذهول . الحقيقة هكذا ،  
عندما تلطمها الأكاذيب وتحاصرها ، يصيبها  
الذهول ، ويعطل فاعليتها ، ويسمح  
للأكاذيب بالتسرب وابتزاز مواقع الحقيقة .  
المرعب أنهم يربكون سياق التاريخ

وَيَقْلِقُونَ حركته عندما يَحشونه بهذه  
الأكاذيب .

تصوّر أن الناس بعد مئة عام يقرأون ما كتبنا  
وما كتبوا ولا يدرون من منا الصادق !  
ولكن الحقيقة تبقى حقيقة . ●

بلا شك ، ولكن بلا فاعلية . أتدري كم من  
الحقائق دُفنت في أكوام الأكاذيب ، ولن  
تُحشر حتى في يوم القيامة ؟! □

بدأت ترعبني . ●

أنا أيضاً مرعوب مما أقول . الحقيقة الآن  
مفتّرة ، تنهشها الجوارح والسباع ، مثل  
الجمال الكسير . □

ولكنها ليست شيئاً مجرداً تائهاً في الفضاء  
مثلاً تقول ، الحقيقة تحضر في الذاكرة وتمهّد  
موقعها ولا يمكن محوها بالمحاة . ●

أحسنت ؛ هذا هو بيت القصيد ؛ إنهم لا  
يمحون الحقيقة ، بل يهدمون بيتها ، يهدمون  
الذاكرة فتدفن الحقيقة تحت ركام الذاكرة  
المهدومة . خذ محمود مثلاً ؛ لقد دمّروا □

ذاكرته تماماً .

● غسيل دماغ .

□ المسألة أعقد من هذا التعبير المتداول ؛ لقد

بدأوا ينسُلون خيوطها خيطاً خيطاً حتى  
انحَلَّتْ مثلما ينحلّ النسيج ، ثم أعادوا  
حياكتها بالخيوط نفسها ، ولكن بتصميم  
جديد ، وحَشَوها بمعلومات جديدة غير ما  
كان فيها .

● وإذن فلا غرابة في أن يتحدث عن الأهوار

بهذا الشكل ؟!

□ أبداً ! الغرابة في عناده وعدائه لكل ماضيه .

● (ينهض ويستل كتاباً ، يقلب صفحاته ويقف عند إحداها) ،

إسمع ما كُتِبَ عنه في معجم الأدباء :

«محمود الشاهد : شاعر وصحفي ورسام  
وروائي ، نشأ في عائلة فقيرة ولم يدخل المدرسة ،  
إلا أنه علّم نفسه بنفسه ، وواكب الشعراء  
والأدباء والفنانين ، وكتب الشعر والنقد الأدبي  
والفني . ساهم في حركة التجديد في الشعر ،

وأنشأ جريدة (الرؤية) ، وسجن وعذب فما  
انكسر . له من الأعمال روايتان وثلاثة دواوين ،  
وكتاب في النقد الفني ، والعديد من اللوحات » .

(ظلام تدريجي)



(٤)

مكان ما .  
محمود والنجمة .

- أنت ترى أن بين هذه المسرحية والتي  
سبقتهَا بَوْنًا شاسعاً ؛ هذا طبيعي ، فلو  
كنتُ وقفتُ عندَ حدودِ الأولى لَمُتُ في  
مكاني .
- \* صحيح ! لو وقفتُ في مكانك لانتهيت .  
ولكن المسافة بين المسرحيتين ليست في  
البناء الدرامي ، إنما في الأفكار ، وفكر الثانية  
يناقض الأولى .
- تجارب ! تجربتي أوصلتني إلى هنا . لماذا لا  
تأخذون تجربتي في الحساب ؟
- \* أحسب أنها أخذتُ في الحسبان ، وكُتِبَ  
عنها ما يُفهم منه أنك لم تُضف جديداً إلى  
تجربتك السابقة ، وأن أفكارك جاءت مشوشة  
ومضطربة ، بل متناقضة .

- لم أستغرب ذلك ، فالمعارضون لا يرون في ما أكتب شيئاً يلائم مذاقهم .
- \* المسألة ليست مسألة مذاق ؛ بل مسألة التعامل مع الحقائق .
- الحقائق عندهم راکدة ، بالية ، إنهم في عالم آخر ، عالم لا يشبه واقع الحال ولا يقيم وزناً لكل المستجدات . هكذا يحترق الوطن ، والمدلون يكتبون أشعاراً عن الزهور ، ويرسمون الأزقة التي اكتسحها التقدم ، ويتغنون بالنخيل ، ولا يرون أن النار أكلتنا وأكلت النخيل .
- \* إنهم يتحدثون عن بهاء الوطن ، ويستعيدون صورته الجميلة التي شُوّهت .
- فليأتوا هنا ليروا ما حلّ بالوطن ، ليساهموا في دوامة الدمار التي نعيشها ، ويكفّوا عن التبجح بالوطنية التي يكتبون عنها وهم مسترخون في مقاهي باريس وغيرها من (باستخفاف) مدن المنفى!
- من يحب الوطن يأتي إليه ، ولا يتصدق علينا بالنواح .

- \* ولكنك تعرف لماذا هم هناك .
- لا يهمني أن أعرف . إنهم يحتسون أطيب النبيذ ويتباكون على الوطن . الوطن هنا ، وليس في لوحات الهاربين وبكائياتهم .
- \* الوطن جغرافية روحية ، يحملها المرء حيثما اتجه ، وليس من حق أحد أن يسلب وطنية الناس لمجرد كونهم خارج الحدود .
- هذا كلام نظري ، الواقع غير ذلك ، الواقع أننا نبني الوطن وننتصر على أعدائه ، والوطني من يساهم في هذه الانتصارات .
- \* استاذ محمود ، نحن نتكلم كإخوان ، وبصراحة تامة ؛ أعتقد فعلاً أننا ننتصر ؟
- لماذا تشكّون في ذلك ؟
- \* نحن مندهشون من حماسك وأنت ترى ما يجري .
- أنا أرى وأنتم ترون ، ولكن زاوية النظر مختلفة ؛ أنا واثق مما أقوله وأكتبه ، وأنتم لا ترون غير ما تعودتم عليه ، لا ترون حدود الواقع . لماذا لا تتحسسون محنة الآخرين ؟

- حاولوا لمرة واحدة أن تتعاملوا مع الأمور كما هي .  
 \* ولكن ما يجري مرفوض أصلاً .  
 ○ لماذا ترفضونه وأنتم سبب وجوده ؟ ألسنا كلنا مسؤولين عما يجري ؟!  
 \* ليتني أقوى على تصديقك !  
 ○ لم يعد يهمني تصديقك ، لم يعد يهمني ما يقال ، لم أعد أقوى على هذه المساجلات الفارغة . . . (يتهالك) . . . إتركوني ، دعوني أتلذذ بكأسي الأخيرة ، وليأخذ الشيطان نخلكم ووطنكم ومنافيكم .

- (ظلام . بؤرة ضوء على محمود وحده) ،  
 ○ يا إلهي ، إنهم يدوسون على الجرح بلا رحمة . يقودون خيولهم على صحراء أحلامي الجافة ، يفترشون خراب روحي ، وَيَمْنُون عليّ برأفة لا أريدها .  
 لا أريدهم ، لا أريد هذا العالم القبيح . أريد أن أسند رأسي إلى أي حصاة ، وأنام إلى الأبد .

(ظلام)

# يا غريب اذكر هَلَكُ

٢

١٩٩٥

الزمان : بعد حرب الخليج  
المكان : أي بلد غربي



## مقدم المسرحية

(يظهر أمام الستارة لتقديم المسرحية . شخصية حيوية ومرحة) :

« حتى ندخل بجوّ المسرحية ، ينراد إلنه  
مقدمة خفيفة لطيفة تگود المشاهد من إيده  
وتحطّه بالجوّ .

والله يابه عوافي عالمشاهدين ، شلون دلال ،  
الناس هيّ اللي تروح للجو مو يجيولها الجو  
گود بند ، ويگولولها تفضلي خاتم !  
يا الله يابه شلك بهالعائوره ، توذي الجوّ . .  
تجيب الجوّ . . دِنْ دِنْ دَوْ ، ما علينا ، المهم  
إدخل إنتِ أوّل ، وتالي حير بالمشاهدين .  
يا الله يابه :

بعد الإتكال على الله ، ومساعدة قواته  
الوطنية المسلحة . . يا مسلّحة ؛ المنزوعة  
السلاح ! إي والله مع الأسف .

. . . المنزوعة السلاح ، والقادمة إيد من  
وره وإيد من گدام . . .

أشو هم دخل السلاح ؟ شيله !  
إي عفيه ، النوب شيله ، إحنه نريد تتخلص  
منّه يکول شيله!

. . . بعد الإتكال على الله ومساعدة قواته  
الوطنية المهاجرة ، رسمنا بما هو آت . . .  
رسمنا ؟ ليش عود رسمنا ؟  
كتبنا ما هو آت .  
يمكن إذا بقينه نفلسف الجمل ، ونُبْخوش  
بالكلمات ، راح نبقه نراوح بمكاننا من طگة  
البريج إل حلة الهوش .  
إدخل عاد وفضها .

ترفع الستارة  
يدخل ، ويخرج من يمين المسرح .



(١)

■ ■ ■ في بيت عماد  
عماد ، أم عماد ، سعاد

عماد : يوم . . . أم سمير رايحه هل أسبوع  
البغداد ، بلكي تگدر تاخذ وياها شي  
للحجیة .

أم عماد : مترید تاخذ ، تگول بس فلوس .  
عماد : مو مترید تاخذ ماما ، متگدر تاخذ .  
أم عماد : لیش عود متگدر ؟ هیّه وصلة قماش  
متطلع إلها کیلو .

عماد : یّه إذا منّج کیلو ومن غیرچ کیلو ،  
إحسبی شگد راح یطلع علیها وزن .  
ثم منو یگوللّج راح یسمحون  
بإدخال هالحاجات ؟

أم عماد : لیش میسمحون ؟  
عماد : یّه هاي ما بیها لیش وما لیش ،  
الجماعة عقلهم بالساعات ، وانتي

وحظّج . إفترضي ما سمحولها ،  
 وصادروا الحاجات ، شترّاح تگول  
 لكم ؟ وإذا إنتي صدگتي بيها يمكن  
 غيرچ ميصدگ . وعليمن هالمشاكل ؟  
 فوگ زينيتها تطلع مو خوش آدمية .  
 أحسن شي ، لا أرى القرد ولا القرد  
 يراني .

أم عماد : أشو أبو سوسن من راح أخذ وياه  
 چيس شكبره .

عماد : أبو سوسن وضعه غير وضع . هو أولاً  
 مدعو ، ثم عنده بطاقة مغتربين ،  
 مخّد يتحرّش بيه . خلّي ندرز بيدها  
 چم دولار .

أم عماد : إذا جوّه إيدك ليش لع .

عماد : والله يّمه تريدين الصدگ ، ما جوّه  
 إيدي ، بس راح أتداين من منصور  
 وراس الشهر أدفع له .

أم عماد : والله يّمه يصيبك أجر .

عماد : لويش يصيبني أجر ، هيّه مو  
 خالتي . إحنه طلّعنا بجلدنا وشفنا

- الضيم ، وهسه الحمد لله ، بس هيّه  
المسكينة گاعده هناك على تقاعدها  
ووراها هالجعويط ، مو الله يساعدها .
- أم عماد :** الله يساعدها ويساعدنا .
- عماد :** الله ساعدنا ، هسه إحنه لازم نساعد .
- أم عماد :** الحمد لله ، ما طول الله نَجّاك من ذبيح  
المحنه شَمِيجي تقبل بيه . بس آني  
بالي يَمّ علاء ، باقي هناك مجتّف  
وكأته القهر .
- عماد :** يّه تره علاء صوچه ، مو صارتله مية  
فرصة وما طلّع منها راس .
- أم عماد :** خو مو كلهم مثلك إبني ، الناس  
أشكال .
- عماد :** صحيح ، بس هوّ طول وكتّه يُونُونُ ،  
ومن تجي فرصة ميعرف شلون  
يتصرف ، ذابها يمّ الله وسأكت .
- أم عماد :** طبعاً يذبها يمّ الله ، لعد شيسوي ؟
- عماد :** إي الله خومو يطلّع له جواز وينطيه  
خرجيه ، ويقدم له طلب ويگول له  
تفضل دكتور . هذا حسبته مثل  
حسبة ذاك المومن .

أم عماد : يا مومن ؟

عماد : هاي نكته جّتي ببالي :

« صار فيضان بالولاية ، والمي صعد  
للحزام ، الناس كلها هجّت ، بقه  
المومن واكف وحده بالشارع ، والمي  
واصل الصدره . مرّت بيه سيارة  
زغيره ، وكف السايق وكله تفضّل  
مولانا ، تره ما ظل أحد بالولاية ،  
والمي ديصعد . كّلّه روح إبنّي الله  
وياك ، آني إلي الله .

لحّ عليه السايق ، ما كان يفيد . خلاه  
وراح . بعد ساعه جّتي سيارة إسعاف ،  
شافت المومن والمي واصل الحتفه ،  
گالوله إصعد مولانا تره الولاية غرگت  
وما بقى بيها غير بس إنت . كّلّه روح  
إبنّي آني إلي الله .

بعد ساعه جا لوري چبير ، شافوا  
المومن والمي واصل الحنچه . وكفوا له  
وحاولوا يقنعوه ديروح وياهم ، ما  
قبّل . گال إلهم روحو ولدي آني إلي  
الله .

ترکوه . سعد المي وکرفه وياه ، وراح  
الدار حقّه .

يوم القيامة ، وگف المومن گدام الله  
مکسور خاطر وعيونه تعتب .

الله من شافه بهل وضع گله : ها ؟  
گله ليش يا مولاي خجلتني گدام  
الناس ، وغرگتني ، وآني معتمد  
عليك ؟

الله گله : ملعون الوالدين دزيت لك  
ثلث سيارات ، وحده زغيره ، ووحده  
پيك آپ ، ووراهن لوري ، وإنته واگف  
تتمقلج » !

هسه عاد ولا حسبه علاء .

أم عماد : أستغفر الله ، إنتَ متجوز من  
سوالفك .

عماد : يّه مو أكو ناس يريدها تجهيم

ملبلبه . وهوّ الله يسلمه من  
هالصنف ، دكتور وجاي وفد ، بعد  
شکو راجع .

أم عماد : شلون لعد ، قابل يخلي أهله بحلگ  
السبع ؟

عماد : لعد لا یوئون ، الیرید شی یعوف  
شی . ما دام هذا اختیاره خل یرضه  
بیه .

أم عماد : یمه لیش هیّه طلعتنه اختیار ؟ إحنه  
لو مو حملنه خفیف چان گذرنه  
نطلع ؟ وترید الصدگ ، آنی لو مو  
خایفه علیک وعلى أختک ، چان  
بقیت ببیتی ، بس گلت هیّه کلها  
شهر شهرین ونرد لهلنه ، أشو صار  
إلنه تلت سنین وماکو فرج .

عماد : یمه أكو ناس صار إلهم ١٧ سنه ،  
وبعدهم محضرين جنطهم .  
أگول ، إنتی لو تحاولین تدخلین دورة  
لغة مو أحسن من الإنتظار . إنتی  
معلمه وهای تفیدچ من نرجع .

أم عماد : والله یمه ما لی واهس ، علی مود  
هالشهرین تلاته کاتله نفسی  
بالروحه والچیّه .

عماد : منو يگول شهرين تلاته ؟ ليش مو  
 سنتين تلاته ؟  
 أم عماد : فال الله ولا فالك ، النوب يريد  
 يخليني سنتين تلاته .

## ■ تدخل سعاد

سعاد : هلو !  
 عماد : هلو سعووده ، شلونچ ؟  
 أم عماد : هله ماما ، چتا نحچي على ابن  
 خالتچ علاء .  
 سعاد : هم نفس القوانه .  
 أم عماد : إنچي وليچ ، تسميها قوانه ، لعد  
 شتريدينه نحچي ؟  
 سعاد : هم راح تخلوني أعيد قواني . آني  
 أگول لازم تبدلون وضعكم .  
 عماد : والله يابه حقچ .  
 سعاد : هسته إتو صار إلكم تلت سنين ببلد  
 أورپي ، بعالم جديد ، كلشي مفتوح

إلکم ، لیش متستفیدون منه ؟ أشو  
الأكل عراقي ، اللبس عراقي ،  
العلاقات عراقية ، السوالف عراقية ،  
حتى النكات عراقية . زين ما کو  
بہالبلد شي يسوہ ؟

أم عماد : يعني فکرچ ؟ أشو إحنہ ناس  
معزولين ، حتى الجيران من  
يشوفونه ما یسلمون .

سعاد : إنتو عازلين نفسکم ، إنتو متریدون  
تختلطون . تگول الجيران میسلمون ،

زين إنتي سلمی علیہم ، إبدی  
إنتي ، سلمی ، سولفی ویاہم ،  
روحي إلہم ، إعزمیہم ، غیر ہیچی  
تصیر العلاقات . إذا إنتي گاعده  
وساکتہ ، إذا طلعتی رحتی یم أم  
سمیر لو یم أم ندی لو غیرها من  
الجماعہ . تمشین عشر کیلو مترات  
حتى تجیبین شینت دتسوین تَمَن  
باگلہ . والجراید التقروها نفس  
الجراید ، ونفس اللغہ ونفس



المشاكل . جربي فد يوم تاكلين  
أكلهم ، تحچين وياهم ، تتعلمين  
لغتهم ، تطلعين للپارك .  
إننتو متزوجون ؟!

أم عماد : كافي محاضرات . فوك ما أدللها  
وأسويلها تئن باگلّه . النوب أخليچ  
تموتين من الجوع ، خلي الهامبرگر  
والسباگيتي يخييس بطنج . تگوللي  
سلمي عليهم وإحچي وياهم ، ليش  
همّه ينطون مجال ، أشو واحدهم  
وجهه ييچي عبالك مداين ربّه  
فلوس . وبيا لقة أحچي وياهم ؟  
سعاد : تعلمي لغتهم ، مو أحسن تتعرفين  
على محيطهم .

عماد : مو هذا الجنة أگول إلها إياه .  
تگلي بعد شهرين تلاته راجعين ،  
عليمن مدوخه راسي .

سعاد : وين راجعين ؟ آني ما أرجع .  
أم عماد : إنچتي ولج ، مترجع ، والله أكستر  
راسچ ، أکو وحده تبقه وحدها  
بهاالبلد الفاسد ؟!

سعاد : ليش تسميه فاسد ؟ أشو الناس  
مرتاحه ومترقهه ، وعندها حرّيه ،  
والبلد جميل ومتحضّر ، وكلشي  
موجود بيه .

أم عماد : حرّيه ، عابت هالحرّيه ، لو مو  
هالحرّيه الزايده چان ما وصلو  
الهالحالة .

سعاد : ليش شبّيه هالحرّيه ؟  
أم عماد : بنتي هاي مو حرّيه ، هذا فساد ،  
الحرّيه تخلي الناس تعيش بكرامه  
وشرف ، هاي الحرّيه النطالب بيها  
من فكينه عيوننا لليوم ، وقدمنا لها  
ضحايا بالألوف ، مو حرّيه الديسكو  
والشدوذ .

سعاد : ماما مفهومج للحرّيه على راسي .  
إحنه تربينه هالشكل ، بس الناس  
تربيتهم تختلف ، مفهومهم للحرّيه  
هم يختلف . ليش تسميه شدوذ .  
أم عماد : مدتشوفهم ، لا ديانه لا أخلاق لا  
تعاون .

- سعاد : ليش لا ديانه لا أخلاق ، لعد  
هالكنائس التارسه الدنيا لمن ؟  
أم عماد : ما أدري ، آني هيچي بلد ميعجبني .  
عماد : يّه مو زين ساترين عليه وملقينه ،  
چان وين ولينه وجوهنا بهالمحنة ،  
مو خلف الله عليهم ، لو إحنه چان  
قبلنه هالگد بشر غرباء عالبلد ؟  
سعاد : مو بس غرباء ، غرباء عليه وعلى  
حضارته وتقاليده وسلوكه ، ومع ذلك  
قابل بينا وإحنه بالملايين .  
أم عماد : يابه خلف الله عليهم ، إحنه غير من  
ضيمننا نحچي . دا آگوم أسويلکم غده .  
سعاد : لع ، إنتي إگعدي ارتاحي ، اليوم  
الغده عليّ ، راح أسويلکم أكلة أورپیّة .

«ستار»



■ ■ في البار «ستار ومحمود»

- ستار : سمعت تنبّوات السنه الجديده ؟  
محمود : يابه متخليه من هالملخيّات .  
ستار : دسمع ، يگول لك النظام راح يسقط .  
محمود : زَعَم الفرزدق أن سَيَقْتُلُ مَرَبَعاً  
أبشر بطولِ سلامةٍ يا مَرَبَعُ  
ستار : بلكي ربك وتجي راس گله .  
محمود : بالله مو عجيبه ، بلد بهالخضاره  
وهالتقدم ، يصدگ بهالملخيّات! هسته  
آني ما أريد أقايس ، بس بلدنا  
اليعتبروه متخلف مو تجاوز هالمكسرات  
من زمان .  
ستار : ليش تروح بعيد ، حتى الإنتخابات  
الرئاسية هنا ، تعتمد عالخيرة . وإحنه

چٲٲٲٲ نمزق عالكر من چان ياخذ خيرة  
بالطوبجي .

محمود : إي هاي شلون تفسرها ، بلد  
بهاالمستوى يصدگ بهاخرافات ؟  
الجراید ملیانه إعلانات ، بالتلفزيون  
برنامج يومي ، وفتاحين الفال طاميلك  
الدنيا ، لعد لمن هالكتب وهالثقافة ؟!  
ذاك اليوم مثلاً قدّموا برنامج  
يتذكرون بيه التنبؤات مال گبل  
عشر سنين ، طلعت كلها جذب .  
والناس مع ذلك مجلبه بيها . زين  
هالمثقفين ميحچون ، مينورون الناس .

ستار : المثقفين ميصدگون بيها .

محمود : لعد ليش ميحچون ؟

ستار : هذي من خصائص المجتمع  
الرأسمالي ، أكو دائماً نخبة  
متميّزه ، وأكو جمهور عادي ،  
النخبة ما عليها بالجمهور .

محمود : هم خرّجتها ؟ ما تفك ياخه من  
الرأسمالي والإشتراكي ، إشتراكيه

وراحت الدار حقها ، وإنته بعدك  
بهاالعقل .

ستار : أكو نظام اشتراكي انهار ، الإشتراكية  
فكر ، والأفكار متنهار .

محمود : تعال أگلک ، خلي نكون واقعيين ،  
إنته إجه ببالك من چنت تناضل ضد  
الرأسمالية أنك فد يوم من الأيام  
تكون ضيف على بلد رأسمالي ،  
تعيش بيه بحرية وبضمانات حتى  
ببلدك اليسموه اشتراكي ما موجوده ؟  
ستار : طبعاً لا . بس هاي دنيا . ثم آني ما  
متخلي عن مبادئي .

محمود : مبادئك على راسي . بس مو إنته  
الچنت تكتب بالجرايد عن الإنهيار  
الإقتصادي والإجتماعي والأخلاقي  
بالبلدان الرأسمالية . وين راح ذاك  
الحچي ؟

ستار : ذاك چان بوكته ، لكل مقام مقال .

محمود : يعني ذیچ الأفكار انلפטت .

ستار : شوف ، إحنه چنه متحمسين ،

والحقايق چانت خافية عليه . ثم  
شنو الغلط إذا صححت آرائي ؟

محمود : ماكو غلط ، بالعكس ، هذا شي زين  
أن واحد يكون موضوعي . بس إنته  
مقتنع بينك وبين نفسك أنك موضوعي ؟

ستار : شوف أبو فوزي ، الموضوعية يعني أن  
نكون واقعيين ، آني دا أعيش واقع  
مختلف ، يعني أبقى مچلب بأغلاطي ؟

محمود : لا . إنته تفتهم ، الواقعية شي  
والموضوعية شي ثاني ، يمكن يكون  
الواقع مو موضوعي ، تمام لو مو تمام ؟  
ستار : تمام .

محمود : ولهذا إحنه نعتمد عالموضوعية في  
تغيير الواقع ، مو هيچي ؟

ستار : أبو فوزي ، يخليلك فوزي ، خلي  
نعيش مثل الناس ببساطة وبدون  
تخريجات وفلسفات . أشو هالعمر  
كله راح بهالمناقشات اللي لا تودّي ولا  
تجيب .

محمود : عيش مثل ميعجبك ، مّحد إله شغل  
بيك ، بس لتگوم تنظر لي الأفكار



المقلوبة وتريد تقنعني بيها .

ستار : إنته الله ميقنعك .

محمود : بس أكو غيري يصدگون بيك . شويته  
إرأف بيهم .

ستار : هسته يا أخي آني ماكل شارب ، أشو  
إنته أكلتني حاصل فاصل .

محمود : إذا آني صديقك ما أصارحك ، لعد

منو الراح يگوللك إنته وين واگف ؟  
ستار : صديقي وعلى راسي ، بس متگللي  
آني شمسوي ؟

محمود : لعد هالمقالات الدتكتبها بها لجراید

الفاسده شتسميها ؟ مو إنته دتحرگ

الأول والتالي . يعني ضروري تنزل  
نفسك إلهالمستوى ؟

ستار : أبو فوزي تره ما أسمح لك ، آني

عندي قناعاتي وأعرف شلون أتصرف .

محمود : والله ستار آني زين أعرفك ، لا قناعات

ولا من يحزنون ، بس إنته تريد تبقه

تحت الأضواء بأي ثمن .

ستار : وشنو ، هاي عيب ؟

**محمود :** لا مو عيب ! أشو إنته زگرتي ، بيتك

ناطيتك إياه الحكومة ، ضمان

اجتماعي وصحي عندك ، وراتبك

يكفيك ، متقدر تتكثّر وتسكت

إذا متقدر تگول الصدگ ؟

**ستار :** أبو فوزي ، راتبي قوت لا يموت . ما

أريد أشتري كتب ، أروح للسينما ،

أسافر ؟

**محمود :** ستار ، اليريد شي يعوف شي . إنته

لو تريد تحافظ على نظافة أفكارك

چان گذرت .

**ستار :** لا . إنته ثختها هوايه . شنو أفكاري

وصخه ؟

**محمود :** إي وصخه .

**ستار :** إلزم حدودك ولا تروح زايد . آني

مقدرک ودا أستمع لك . آني عالآقل

عندي أفكار ، وصخه مو وصخه هاي

متروكة للزمن ، بس متگللي إنته

شعندك غير الحچي ؟

**محمود :** آني العليّ گلته ، والقضية بقت يّك .

« يخرج محمود » .

(٣)

## ■ ■ في بيت أبو إياد

« صالون فخم وناس أتهات في سهرة عمل . .  
مشروبات ، مزّة ، إلخ . »

(أكرم ، أبو إياد ، دكتور جعفر ، مهدي ،  
يونس ، ناظم) .

أبو أياد : أستاذ أكرم متدز إنه فاكس لأبو  
مروان تكلله إحنه مجتمعين هسته  
ببيتنا ، وناقشنا الموضوع  
بالتفصيل ، ونريده يجي يوم السبت  
حتى يشوف آراء الجماعة ونصيغ  
النظام الداخلي .

أكرم : حاضر .

مهدي : يابه ، موضوع حساس من هالنوع  
ميصير بالفاكس ، إلزم التلفون  
واشرح له التفاصيل ، حتى من يجي

ما نعيد الحجي من أوله .  
أبو أياد : مو خابرتّه تلت مرات مَحْد يجاوب .  
مهدي : خابره هسته ميكن رجع .  
أبو أياد : يابه إلغي الفاكس ، خلي نخابره مرة  
الليخ .

«يخابر» :

أبو أياد : أبو مروان . . . شلونك عزيزي . . .  
زين حصلناك ، صار عدة مرات نتصل  
ومَحْد يرد . . . هيجي ؟ . . . هذا  
خوش خبر . . . لعد انتهت على  
خير ، تهانينا . . . ليش بعد ما  
وَقَعَتِو العقد ؟ . . . لتعطّلها تراه  
التأخير مو زين ، ليروح واحد  
يطلعك صفح ويخربط الشغله . . .  
إي أعرفه . . . تريد أحجي لك وياه  
. . . ممكن ، طبعاً ممكن . . . بس  
هاي مو مال تلفون . . . ميخالف ،  
باچر ما أگدر . . . عگب باچر آني  
عندك . . . يمعوّد كلها خمس  
ساعات بالطيارة . . . أبد ، كل

زحمه ماكو . . . لعد هسه  
 موضوعنا منحجي بيه . . . موضوع  
 الحزب . . . مو إحنه كلنا مجتمعين  
 ببیتنا وتوصلنا إلى صیغه نهائیه  
 نریدك تطّلع علیها حتی نصدّر بیان  
 التأسیس . . . أدري مو ضروري  
 تحضر . . . لكن گلنا هم نشوفك ،  
 وهم تتعرف عالإخوان ، وتعرف  
 التفاصيل . . . أشكر ثقتك . . .  
 لعد إحنه راح نخلي إسمك ویانا  
 وننشر البیان یوم الثنین ، ومن أجي  
 أشرح لك التفاصيل . . . لا ، إنحلت  
 . . . لگینالها صیغه بیها مرونه  
 شویّه . . . زین عزیزي ، تهانینا مرة  
 أخرى . . . آني عگب باچر  
 عندك . . . تصبح علی خیر .

« إلى الجماعة » :

میگذر یچی ، عنده عقد چبیر  
 مشغول بیه ، آني راح أروح له عگب  
 باچر . علی کلّ نگذر نصدّر البیان

ونخلّي إسمه ويانه .  
يونس : زين هاي مسألة أبو مروان انتهت ،  
بقي تحقّظ الدكتور جعفر بعد ما  
انحسم .

د . جعفر : والله آني أشوف هالنقطه دقيقه  
جداً ، إذا منحلها وبوضوح كامل ،  
آني أعتذر .

يونس : إنته شنو اعتراضك على هالنقطه ؟  
د . جعفر : يا أخي أكو بلندن ستين حزب  
عراقي ، قسم من هالأتجاه وقسم من  
ذاك ، إحنه بيش نتميّز عنهم ؟ إذا  
البرامج متشابهه ليش دنبعشر  
الجهود ، خو نروح وياهم .  
وهالنقطه هيّه اللي تميّزنا ، خلي  
نكون الحزب الوحيد المايفرّج  
لأمريكا .

يونس : لا يا دكتور ، إنته شلون تسميه  
تفريج لأمريكا ؟ إحنه كل علاقه ما  
إلنه لا بأمريكا ولا بأي بلد أجنبي .  
د . جعفر : آني مدا أطعن بوطنية أحد ، لكن

أُكو بعض التوجهات ، بنهاية الأمر ،  
تصب بالنهر الأمريكي ، ومنها  
هالمسأله .

**مهدي :** بس دكتور إحنه متفقين على كل  
التفاصيل ، ومنها هالنقطه ، وصار  
إلنه شهر دناقش ، خل نذبها على  
قيله .

**د . جعفر :** آني من الأول تحفظت على هالنقطه ،  
وأعتقد من مصلحتنا كلنا أن نكون  
متفقين على كل التفاصيل حتى  
نكون كتلة وحده . آني مسألة  
قرارات الأمم المتحدة ما أقبلها كلها ،  
بيها قرارات مجحفة بحقنا وحق  
الأجيال القادمة ، خلي نعزلها على  
صفحه ونناقشها واحد واحد ، واللي  
منقبل بيه نثبت اعتراضنا عليه  
ونرفضه .

**أبو أياد :** يابه مو هيّه هالقرارات مفتاح  
الإعتراف بالحزب ، وإذا منوافق  
عليها نبقه معزولين .

- د . جعفر : معزولين عن مَنْ ؟
- أبو أياد : عن المجتمع الدولي غير ؟
- د . جعفر : أبو إياد إحنه نريد ننظم رفضنا ،  
وندافع عن حقوق بلدنا ، المجتمع  
الدولي شنو .
- يونس : شلون المجتمع الدولي شنو ؟ هو كل  
الحل والربط بيده . يعني بهالحاله  
إحنه نعزل نفسنا من البداية .
- مهدي : يابه هسّه إحنه ليش دنضيع وقتنا  
ونبقه ندور بحلقه مفرغه ، خل نتفق  
عالحد الأدنى .
- د ، جعفر : عزيزي ، ليش هالحد الأدنى ، مو  
إحنه كلنا بنفس المصيبه ، خلّي  
نكون واضحين وجريئين ، ونكول  
كلمتنا بقوة وثقة ، وما نقبل إلاّ  
بالحد الأقصى .
- مهدي : والله آني من الأول هذا رأيي .
- د . جعفر : لعد ليش ما تمسكت بيه ؟
- ناظم : لأن مثل ما گال أستاذ يونس ، أكو  
خطوط حمراء ، وإذا إحنه بقينا



متعنتين ما راح نسوي شي .  
د ، جعفر : إذن راح يصير حالنا حال الجماعه ،  
فعليمن هالحزب الجديد ؟  
يونس : لأن إحنه وجوه معروفه ، وإلنا حضور  
بالساحة السياسية .

د . جعفر : أستاذ يونس ، إنتو وتجربتك  
السياسية على راسي ، بس إنته من  
چنت بذاك الحزب ليش طلعت منه ؟  
يونس : اختلفنا .

د . جعفر : عlish اختلفت وياهم ؟  
يونس : عاللاقات الخارجية ، ونشرت بيان  
شرحت بيه الوضع بالتفصيل .  
د . جعفر : أعرف بيه . قصدي من هالسؤال أن  
نتجنب مسألة الحد الأدنى حتى لا  
نختلف ويتفلش الحزب من أول  
امتحان .

يونس : بس يا أخي إحنه سياسيين ،  
والسياسة مثل ما يگولون فن  
الممكن . إحنه لازم ناخذ بالإعتبار  
الوضع العام ، ونكون ضمنه ، خو مو

وحد عن العالم . ثم إحنه منكدر  
نسوي شمريد ، أكو خطوط  
حمراء ملازم نتجاوزها . أخذ  
مسألة القرارات ، اليوم ماكو حزب  
مياخذها باعتباره .

أبو أياد : آني التقيت بالسفير بطنجة ،  
وتفاهمنا بكل التفاصيل ، غال  
مسألة إسقاط النظام ما تعيننا ،  
هاي قضيتكم ، بس قرارات الأمم  
المتحدة لازم تتنفذ كلها ، جملة  
وتفصيلاً .

يونس : شفت أغاتي ، هذي من جملة  
الخطوط الحمراء .

د . جعفر : آني مدا أفتهم إحنه دنسوي حزب  
حتى ندافع عن قرارات الأمم  
المتحدة ، لو حتى ندافع عن شعبنا .  
إذا كانت هالقرارات تمرّد البلد ،  
وترهن ثرواته ، شلنا شغل بيها ،  
وعليش دندافع عنها ، ثم منو هيّه  
الأمم المتحدة ؟ هيّه أمريكا

لوغيرها ؟ مدنشوف شسوت الأمم  
المتحدة بالصومال والبوسنة  
وغيرها ؟ تفضل گلي ، هالأحزاب  
الدتفرج لأمریکا وصلت إلى نتيجة ؟  
گدرت تفك الحصار ؟

ناظم : هم رجعنا على موضوع الحصار ، مو  
هذي قضية ناقشناها مية مرة ،  
ميصير نضل نعيد ونصقل .

د . جعفر : والله يا إخوان آني أحبكم  
وأحترمكم ، وما أريد أصير حجر  
عثرة بطريقكم . توكلوا على الله ،  
وخلوني خارج قوس .

أبو أياد : يعمود گول غيرها ، شلون خارج  
قوس ؟ إحنه كل اعتمادنا عليك ،  
منو من عندنا يگدر يدبر أمر  
الجريدة ؟ أشو إحنه كلنا مثل ما  
تشوف ، رجال أعمال ، ما بينا غير  
إنت وأستاذ مهدي أدباء ، ودكتور  
يونس طيب .

د . جعفر : والله أبو أياد تسمح لي أگول لك ،

آني ما أحب أصير شيش عوازه . لو  
أقتنع مية بالمية وأشتغل بحيل صدر ،  
لو أتكثر . آني مال « السياسة فن  
الممكن » متخش بعقلي .

أبو أياد : والله دكتور جعفر إنته تعرف شگد  
نعزك ونحترم رأيك ، ونفتخر  
بوجودك بيناتنا ، بس بنفس  
الوقت ما نجبرك على شي متريده .  
وبكل الأحوال إنته واحد من عندنا ،  
نتشاور وياك على طول الخط .

د . جعفر : أشكرك أبو أياد ، آني أخليكم  
تاخذون راحتكم .

أبو أياد : عlish مستعجل ، دخلص كاسك  
عاد .

د . جعفر : ميخالف ، نشوفكم بخير ،  
أودعناكم .

« يخرج » .

يونس : آني مدا أقتهم ، لعد عlish صار إنه  
شهر نثرم حجي ، وتالي متالي يدير  
وجهه ويطلع .

أبو أياد : دكتور جعفر رجل وطني نظيف ،  
بس بالسياسة ما عنده خبرة ، خلوه  
براحته .

«ستار»

## (٥)

■ ■ خارج قاعة المحاضرات

عماد ، حمدي ، رضا ، د . جعفر ، عبدالله

عبدالله : بالله ترضون بهالحجي ؟  
حمدي : لعد شچنت تتوقع ؟  
عبدالله : شچنت أتوقع ؟ غير رجال بهالمستوى  
وهاخبرة الطويلة يحترم وضعه ،  
تاريخه . بعد خمسين سنة من النضال  
والكلام المعسول يگللي چنه غلطانين .  
زين غلط يستمر خمسين سنة ؟

« يلحق بهم جبار »  
جبار : شنو مشاريعكم ؟  
عبدالله : نروح للبار .  
عماد : يابه بالبار منگدر نسولف ، خلي  
نشوف مكان آخر .

- د . جعفر : إذا ما عندكم مانع نروح لبيتنا  
نكمل السهرة .
- حمدي : أخاف تصوير زحمة ، إحنه جوغة  
ورايعين على غفلة .
- د . جعفر : يعمود هذا بيتكم ، زحمة عليم .  
لو نصيح طارق يجي ويانه .
- جبار : إذا يجي طارق آني أعتذر  
د . جعفر : مو لازم طارق ، يالله تفضلوا .

« ظلام »

■ ■ ■ في بيت الدكتور جعفر

- د . جعفر « إلى عماد » :
- مقالك بديع بجريدة « الأمل » ،  
واضح وهادي، ومعلوماته وافية .
- عماد : والله دكتور آني ما ردت أنشره  
بهاالجريدة ، بس الأخ رضا لح  
علي ،
- د . جعفر : ليش ؟ شكويها ، هذي هم من  
صحف المعارضة .

عماد : تمام ، بس ردت آنجناب القيل والقال .  
د . جعفر : عيش هالقيل والقال ؟ إنت دتعبّر  
عن أفكارك ، خو مو دتبنّی مواقف  
الجريدة .

عماد : مو الجماعة الله يسلمهم واكفين  
سچينة خاصرة ، يتصيدون الزلّة .  
جبار : آني شخصياً مو وياك بنشره بـ  
«الأمل» .

عماد : تفضل أغاتي .  
جبار : طبعاً مو وياك ، هذي جريدة  
مرتزقة ، وإنت من تنشر بيها ترفع  
قدرها وتزكيها .

د . جعفر : يا مرتزقة يا أخي ؟ دتشوفهم  
يگحفون گحف ، حالهم أنگس من  
حالنا . ثم مرتزقة لمن ؟  
جبار : للنظام .

د . جعفر : لا يا أخي . إحنه صحيح نختلف  
وياهم بالمواقف والتوجهات ، لكن  
ميصير نلزگهم بالنظام . دتشوف  
فاتحين صفحاتها لكل أقلام المعارضة ،



والكتاب الدينشرون بيها معروفين  
بنظافتهم .

**جبار :** طارق نظيف ؟

**د . جعفر :** والله آني ما شوف بكتاباتيه شي  
ناقص .

**جبار :** هذا مخابرات .

**رضا :** يابه على كيفك ، هذا والمخابرات  
شنو ، صار له اثنعش سنه يركض  
والعشه حُبَّاز ، لو مخابرات ماچان  
انكشف ؟

**جبار :** دا اُگوللك مخابرات .

**حمدي :** هسه ما علينه من طارق ، مخابرات  
مو مخابرات ، هذي قضية تحتاج  
تدقيق ، لكن آني من حيث المبدأ ويه  
جبار ، ما موافق عالنشر  
بـ « الأمل » .

**عماد :** أستاذ حمدي رأيك موضع احترامي ،  
بس اُقدر أعرف ليش ؟

**حمدي :** أخ عماد ، الأفكار النظيفة ينراد إليها  
قنوات نظيفة ، إنت تكتب بشكل

ممتاز ، وتحليلاتك دقيقة ، وموقعك  
الفكري مبين ، ميصير تنشر وين ما  
چان .

عماد : يا أخي والله محنة ، كل الجرايد إذا  
تكلّبها لو تطلع محسوبة على  
جهة ، لومولة من جهة ، زين لعد  
وين ننشر ، شلون نوصل أفكارنا ؟  
حمدي : أكو غيرها . إنشر بال « الحقيقة »  
مثلاً .

جبار : هذي هم مخبرات .  
حمدي : عاد إته لتسد كل الدروب .  
« الحقيقة » شجابها عالمخبرات ؟  
گول مجلة رجال أعمال ميخالف ،  
بس مو مخبرات .

جبار : دا أگوللك ذولة كلهم رواتبهم  
توصلهم لهنّا .

حمدي : يا عزيزي عبد الرحمن بيگ محتاج  
لرواتب النظام ؟ هوّ وحده نظام .

جبار : خلص ! هذا مو كافي ؟  
حمدي : عجيب ! يعني إنتّ گوّه تدور لزمه  
عالناس .

د . جعفر : خلّي نكلب صفحة على هالموضوع .

« إلى رضا » : أخ رضا شلون صار

موضوع الإقامة مالتك ؟

رضا : والله دكتور دتتقد ، أوراقي كلها

سحبوها وانطوني مهلة شهر لازم

أغادر .

د . جعفر : زين الحل شنو ؟

رضا : الإخوان غالولي إنطيتها لمحامي هو

يتابعها ، فانطيتها إلى واحد يعرفه

عماد ، ودنشوف .

حمدي : وشغلك ؟

رضا : دا أشتغل حارس بگراج ، والجماعة

الأشتغل عندهم ميدرون أوراقي

انسحبت .

« ظلام تدريجي مع بقاء الستارة مفتوحة .

ينسحب الممثلون ، ويتسلل مقدم المسرحية

من يمين المسرح ويقف أمام الجمهور .

بؤرة ضوء على مقدم المسرحية » :

## ■ ■ ■ مقدم المسرحية :

يا جماعة تعذرونا ، تراه الإخوان  
أخذونه فلاحه ملاحه بالمناقشات  
والمطارحات الفكرية . إحنه رده يصير  
بيها شوية طراوه شويّه حلاوه ، أشوما  
رهمت . آني كئلته للمؤلف من البدايه  
تره ميصير يبقون الجماعه يحچون  
فصحي ، گلي شببيدي ، إذا همّه كلهم  
مشفين وهذا محيطهم وهذي همومهم .  
گتله شويه رحرحها . . لخورها منا منا ،  
خلي المشاهدين يفرحون شويّه تراه كلنا  
كاتلنه القهر .

الحچي بيناتنا ، إذا قواتنا الوطنية  
المهاجرة كلها من هالمستوى ، المؤلف  
شيگدر يسوي .

يگول لك صار أكثر من تلت ملايين  
عراقي برّه وكلهم نخبة ، وين ألگي  
حمّادي العربنجي وشاكر أبو اليانصيب ،  
والله چان بطونكم طگت من الضحك .

لكن ها ، مو عبالكم إذا شفتو مغترب  
عراقي يدفع عربانه راح يحجي وياكم مثل  
حمادي ، لأن هالعربنچي إذا تناظرون ،  
هم يطلع لو صيدلي لو صحفي لو أستاذ  
جامعي .

شنسوئي ، هذا الموجود ، تحملوها ،  
واحسبوها عليّ ، وخلي نشوف شلون  
راح يطلع منها .

## (٦)

■ ■ في بيت عماد  
( أم عماد ، سعاد )

- أم عماد : يه بلكي تگدرين تجين ويایه  
للسوگ .
- سعاد : مو ذاك اليوم رحتي للسوگ .
- أم عماد : باچر جاي رضا ويه أخوچ ، وأريد  
أسويله دوله .
- سعاد : باچر جاي ؟ أشو ما گلتيلي ؟
- أم عماد : الصبح گلي عماد .
- سعاد : عماد كل شغله على غفله .
- أم عماد : الولد مو غريب يه ، حتى لو يجي  
بدون موعد .
- سعاد : زين ماما ، أخابر نادية ونروح .
- سعاد (مع نادية بالتلفون) :  
هلوناد . . . صباح الخير . . .

أدري الدنيه ظهر ، بس أكيد إنتي  
 بعد ما متريگه . . . شفتي مو أني  
 أعرفج . . . شوفي ناد . . . أني  
 دا أخابرچ حتى نأجل الموعد مال  
 باچر . . . شغل . . . صار عندي  
 شغل . . . إمممم . . .  
 إیییی . . . ملعونه . . . ما  
 أدري ، إذا بقى لي وكت  
 أخابرچ . . طبعاً . . . لعد لمن  
 أحجي ؟ . . . إیییی . . . من  
 طقطق للسلام علیکم . . . باي !

« ظلام تدریجي ، ثم إضاءة »

■ ■ في اليوم التالي (بيت عماد)  
 عماد ، رضا ، سعاد ، أم عماد

رضا : عاشت إیدج خاله على هالدوله .  
 أم عماد : ألف عافية خاله ، هذا بيتك ، الخطيه  
 برگبتك شوكت ما تعجبك أكله  
 گلّي ، الله عليك .

رضا : شكراً خاله .  
 أم عماد : سعاد يّيه ذبي الكتلي عالنار .  
 « تذهب سعاد ، ثم تعود بعد قليل »  
 عماد : تره آني حچي جبار البارحة معجبني .  
 رضا : هذا هوّ دائماً هالشكل ، ميخلي واحد  
 ما يگصه .  
 عماد : يا أخي ، جبار وأمثاله ميناقتشوك ،  
 يذبون بوجهك حچي ويقودوك إلى  
 مواقع هُمّه يريدوها ، ويخلّوك تدافع  
 عن نفسك وإنته مو غلطان ، ومتدري  
 شوّكيت تجيك منهم حجارة طايفة .  
 سعاد : ما أظن إلهل درجة ، إنتو وضعكم  
 يختلف ما أتصوّر يتعرّض إلكم .  
 رضا : والله سعاد هاي طبيعة ، أكو ناس  
 ميرتاحون إلا بدم الآخرين ،  
 وهالولد من هالصنف .  
 سعاد : ما يمكن هذا يكون إسقاط من طرفه ؟  
 رضا : هاي ثخينة !  
 سعاد : لا ، العفو ، آني ما دا أشكك



بارتباطاته ، لكن أقصد ربما تكون  
عنده نواقص يخاف أن تطلع عليها  
الناس فيذبها براسهم .

**عماد :** هوّ يمكن يسقط نواقصه على الآخرين  
من جهة ، ويستعملها لإرهاب  
الگدّامه من جهة أخرى ، بحيث  
يخلي الواحد ما ينتقده خوفاً من  
لسانه .

**سعاد :** هسته إنتو شاغلين نفسكم بجبار وغير  
جبار لوّيش ، إنتو مبدعين والمبدع  
وقته ثمين .

**رضا :** لا تبالفين سعاد ، يا مبدعين ، إحنه  
ناس على گد حالنا .

**سعاد :** هذا تواضع . ليش روايتك چانت  
على گد الحال لو چانت عمل إبداعی  
حقيقي .

**عماد :** فعلاً .

**سعاد :** بس آني چانت عندي بعض  
الملاحظات ، راح أگولك إياها  
كملاحظات قارئّة ؛ متشوف إنته

ظلمت سميرة هوايه بروايتك ؟

رضا : ليش ظلمتها ؟

سعاد : تره هذا موبس رأيي ، هوايه بنات  
يگولن ميعرف طبع النساء .

رضا : شنو وجه الظلم ؟

سعاد : البنية مثل ما ذكرت ، عايشه

بالخارج من هيّه زغيره ، وتزوجت  
واحد اجنبي ، ومن صارت بيناتهم  
مشاكل وانفصلوا ، ذبيت الصوچ  
كله عليها ، يعني الرجال ما عليه  
ذنب ؟

رضا : آني أساساً ما أشوف بالمسأله ذنوب ،

ردت أوضّح نقطه ، سميرة نولدت  
بالكوت ، وجّتي ويّه أهلها وعمرها  
سنه ، يعني عمرها كله گضته

بالخارج ، فكّت عيونها ودرست  
وتعلمت وكملت دراستها بالخارج ،  
وچانت تعتقد أنها صارت أورپيه ميه  
بالميه . وره الزواج بسنه ، بدت  
المشاكل ، والمشاكل كانت ثقافيه ،

يعني صحيح همّ عايشين في بيئة  
وحده ، لكن الأسس التربوية  
والثقافية تختلف ، فالصراع كان بين  
ثقافتين في بيئة وحده . سميرة ما  
انتبهت إلهل نقطه الدقيقه ، وراحت  
تفرض وضعها الثقافي المختلف عن  
وضع زوجها ، فصار التصادم .

سعاد : بس هذا مو ذنبها .

رضا : آني ما أعتبره ذنب . آني أخذت  
سميرة نموذج لثقافة بيئة معينة  
موضوعة في بيئة أخرى .

سعاد : يعني ثقافتها وتجربتها بالخارج ما  
نفعتها في تجاوز المشاكل .

رضا : شويّه أبعد من هذا . سميرة كانت

ممزقة بين ثقافة بيئة عراقية ، وبين  
ثقافة بيئة أخرى . كانت تظن أنها  
انسلخت من وضعها العراقي وصار  
بإمكانها أن تتعامل بحرية مع وضعها  
الأوربي . من صارت الحرب ، شافت  
نفسها لا ، المسألة مو بهالبساطه .

في حين أن زوجها ما كان عنده  
تناقض ، لأنه في بيئته وضمن  
ثقافته ؛ هذا المقصود .

سعاد : إحنه ما فسرناها هالشكل ، إحنه  
كلنا المؤلف عنده مشكلة ويّه  
المرأة ، فحملها سبب الانفصال .  
رضا : لا يابه لا ، ما عندي مشكلة غير ويّه  
جبار .

سعاد : الخاطر الله متخلونه من هالجبار .  
أم عماد : خاله وشسويت عالوراق ؟  
رضا : والله خاله دا أنتظر .  
أم عماد : إنشا الله ماكو غير الخير .  
سعاد : والمحامي شغال ؟  
رضا : ميگدر ينطي وعد ، بس غال آني  
ما أقصر .

سعاد : عندي إحساس المشكلة تنحل .  
رضا : الله يسمع من حلگج .  
سعاد : لكن مع ذلك يبقى سؤال . . .  
رضا : شنو ؟  
سعاد (بتردد) : يعني افترض ، لا سمح الله ،

صارت بيها عراقيل ، شنو البديل ؟  
**عماد :** أكو حلّين : لو يبقى يفتر  
بالمطارات ، لو يتزوج وحده من  
هالبلد ويأخذ إقامة .

«تخجل سعاد»

**أم عماد :** فال الله ولا فالك ، إنشا الله تجي  
الموافقة وكلشي يگعد بمكانه .

**رضا :** إنشا الله .

**أم عماد :** والأهل شنو أخبارهم ببغداد ؟  
**رضا :** والله خاله صار ست أشهر أخبارهم  
مقطوعة وتلفون ما عندهم حتى  
واحد يخابر .

**أم عماد :** انطينا عنوانهم ومن تتصل بأختي  
الحجّة نوصيها تروح عليهم .

**رضا :** بسيطة ، تتدبّر . زين خاله آني  
أشكرچ مرة اللخ ، وأرفع الزحمه .  
**عماد :** مو گاعد شكو عندك .

**رضا :** ألحک عالمكتبة الوطنية گبل ميعزلون .  
**أم عماد :** والله يمه بعد وكت .

جسٹ : مو أحتاج فد ساعه أبقى هناك ،  
وباچر سبت . استريحى خالة ، في  
أمان الله سعاد . . أگعد عيني  
عماد ، باچر نتشاوف .

« يخرج » .

أم عماد : والله هالولد جوهره .  
عماد : لعد شعبالچ ، آني أعرف شلون  
اختار أصدقائي .  
سعاد : مو بس أصدقاءك !  
عماد : ملعونه !  
أم عماد : صدگ تگول .  
عماد : شفتي معنويته شگد عاليه ؟  
هالمشاكل اللي تفك الدماغ ،  
وهالظروف المعيشية الصعبة وهو  
ذاك هو . مدرس النقد الأدبي  
حارس في گراج ومهدد بالطرد .  
ومع ذلك يقره ويتابع ويكتب .  
سعاد : حرام واحد مثله يصادف هالمحن .

- عماد :** هاذي حياة يا سعاد ، باجر الوضع  
كله يتبدل .
- سعاد :** صرت مثل ماما ، باجر الوضع كله  
يتبدل .
- عماد :** لا ، آني ما أقصد الوضع بالداخل ،  
أقصد وضع الإنسان . يمكن باجر  
ينطوه إقامة ويلكي الشغل اليناسبه  
وتروح هالمشاكل كلها ، هذي دنيا .
- سعاد :** خابرتك أميرة .
- عماد :** شوكت ؟
- سعاد :** من چنتو تشربون چاي ، گلت إلها  
أصيححه ، گالت لا آني بعدين أخبره .
- عماد :** ماما ، باجر فلاح عنده معرض راح  
نروح آني ورضا وسعاد ، إلچ خلگ  
تجین ویانه ؟
- أم عماد :** يمه آني وين والمعارض وين ؟
- سعاد :** تعالي تونسسي ، شوفي الناس .
- أم عماد :** نشوف متا الباچر .

« ستار »

## (٧)

■ ■ في نزهة خارجية ، أو دعوة

موسعة في بيت .

أم ندى ، أبو علي ، أم سمير ، سهام ، أم  
محمود ، يوسف ، أم عماد ، صاحب ، أبو  
عدنان ، نادية ، سعاد .

أم ندى : فدوه أبو علي فنجاني .

أبو علي : لتستعجلين ، يجيئ السر .

أم سمير : إي خويه أبو علي .

أبو علي : « يتطلع في الفئجان ويديره يمنة

ويسرة » :

داشوف خطين طالعات من نُكره

وصاعدات ليفوك ، معناها إنتي

بالج مشغول بمسألة مهمة ، لا

تحاولين تعقديها ، لا تلمين



مشاكلچ كلها وتريديها تنحل  
دفعه وحده .

أم سمير : بعد شتشف ؟

أبو علي : هذا أهم شي . أكو سفرة بانتظارچ  
لا تفوتيهها .

سهام : وآني أبو علي الله يخليك .

أبو علي : أكو عندچ شي قديم كلش ،  
تريدین تلخوزيه متگردین . حاولي  
تتخلصين منه لأنه واگف عاثوره .

سهام : كلشي قديم ما عندي .

أبو علي : هيانه مبین حي عالصلاه .

سهام : شلون يعني قديم ؟

أبو علي : يعني يمكن يكون حاجة جايبتها  
وياچ ، ويمكن يكون أفكار قديمة  
براسچ .

سهام : وبعد ؟

أبو علي : أكو باب رزق مفتوح عالئص ،  
ينرادلچ صبر وجهد وينفتح كله .

سهام : الله يسمع من حلگك .

أم محمود : وآني يمه أبو علي ؟

أبو علي : هاي شنو خاله أم محمود ؟ هذا  
استكان مو فنجان .

أم محمود : يعني ميصير ؟  
أبو علي : خاله ، هالشفله يسمّوها قراية  
فنجان مو قراية استكان .

أم محمود : يُمّه مو الكهوه تصعد على  
أقادي ، ما أگدر أشربها .

أبو علي : مو هذا كَلّه بَئِلْ .  
أم محمود : والبَئِلْ ما يبيّن بي شي ؟  
أبو علي : « متردداً ومشفقاً » :

بيّين ، بس مو كلش واضح .

أم محمود : هَمْ ميخالف يُمّه ، هاليبيّن .

أبو علي : إنتي حلمانه حلم گبل چم يوم  
وخايفه منه هوايه ، ليظل بالچ ،  
كلشي يصير على كيفچ . داشوف  
إيد تضوي ممدوده إلچ ، وإنتي  
صاعده على تل ودایر مدایرچ  
خَضار .

أم محمود : هاي شمعناها ؟

أبو علي : معناها أكو بشاره راح تجيچ ،  
والخضار خير ، والتل يعني الله  
رافع قدرچ .

أم محمود : بردت گلبي يمه ، رحمه على  
ذيچ الأم الطيبه .

يوسف : و إحنه شوكت يوصلنه السره ،  
أشو كله للنسوان ؟

أم محمود : يمه دخلوا الرجال ياكل لگمته ،  
صار ساعة السندويجة بيده ، مو  
جمدت .

يوسف : إنتي خلصتي شغلتچ يالله تذكرتي  
السندويجة .

أبو علي : يالله جيب ، هذا آخر فنجان .  
دا شوف سبجه شاهولها واگع ،  
بس خيطةها ما مگطوع .

يوسف : شتغني هاي ؟

أبو علي : معناها إنت دتدور بحلقه مفرغه ،  
لازم تقرر وتحسم أمورک ، لتبقه  
متردد . أكو جماعه راح يقدمولک

عرض ، لا ترفضه .

يوسف : متكلّي شوكت يجون هالجماعه ؟

مو صار ست سنين أنتظرهم .

أبو علي : يجون .

يوسف : ليما يبيض الديج .

أم ندى : عاشت إيدج أم عماد عل

هالتبّوله .

أم عماد : ألف عافيه .

أم ندى : أشو آني كلما أسويها جريشها

يصير عجين .

أم عماد : إنتي إختصاصج الأكلات العراقية ،

تبدعين بيها ، التبّوله مو مشكله

شوكت متريدين آني أسويلج

إياها .

أم ندى : يا أكلات عراقية ، إحنه نقشمر

نفسنا ، روجي طلعت ليما لمّيت

آلة الشبزي ، ولليوم ما أگدر ألف

دوله عالأصول ، اللحم مو نفس

اللحم .

أم محمود : وين تلگين ذاك اللحم يا أم

ندی ؟ منین تجیبین ذیچ الیته التموع  
بالحلک ؟ سوّد وجهی علیهم هسته  
شدیا کلون ؟

أم عماد : والله ما أكلت لغمه إذا ما تنقّصت  
إلهم . یگلچ کیلو البصل صار بـ ۹۰۰  
دینار ، الناس منین تجیب ، شلون  
تعیش ؟  
« أم محمود تبكي » .

یوسف : یابه هسته إگلبوا ورقه عل  
هالموضوع ، باچر تصویر سوائف ،  
البچی شراح یغیر ، مو الحمد لله الله  
نجالچ شکری وأبوه ؟ یکن چان  
هسته گصّوا إذنه .

أم محمود : والله یّمه البارحة حلمت حلم  
چان موتني لو ما أکب من النوم .  
أم ندى : خیر إنشا لله .

أم محمود : شفت نفسي بغابة مليانه أشجار  
وحده بصف اللخ ، والأشجار  
تمشي على کیفها ، بعد شویّه  
صارت الأشجار أوادم ، والبشر

تروش مثل أيام عبد الكريم  
 قاسم ، وفوك روسهم غمامه  
 بيضه گامت تسود شويته شويته ،  
 واطلمت الدنيا ، غدت هندس ،  
 ومتسمعين غير الونين . حسيت  
 برجلي لزغت بالغاع ، والونين  
 يعلى ويعلى واني أريد أشلع  
 رجلي ما أگدر ، وما أحس إلا  
 چلابتين چبيره طبغت على  
 خوانيگي ، وايدي ذبلت ، لا أگدر  
 أحرکها ولا أگدر أنهزم . من  
 گبيت ظليت ألث وظلت رگبتي  
 توجعني للظهر .

أم عماد : الله يكسر رگبته الجاب إنه  
 هالبلاوي .

أم ندى : آمين يا رب العالمين .

صاحب : أبو عدنان وين الجريدة ؟

أبو عدنان : عد ناصر ، بيها شي ؟

صاحب : شکو غير المآسي . يوم على يوم  
 دتظلم ، والناس تتجرع المر .

- يوسف : يا جماعه خبر سعيد ، نسيت  
أقوللكم إياه .
- الجميع : خير إن شاء الله ؟
- يوسف : نادية أخذت الدكتوراه بدرجة جيد  
جداً .
- أم عماد : مبارك عليها تستاهل .
- أم ندى : يعني همّ راح تنضمّ القائمة العاطلين .
- أم محمود : ليش يُمه ؟
- أم ندى : خاله مدتشوفين ، أشو كلهم  
عندهم دكتوراه وگاعدين بليّه شغل .
- يوسف : ولا يهمّج ، هذا كله رصيد لمستقبل  
الوطن .
- أم ندى : عاد بس لا يگولولها خلصت دراستج  
إرجعي ، مثلما سوو بصبحي .
- صاحب : صبحي رجعوه ؟
- أم ندى : لا ، بس دمّروا أعصابه ، خلّوا گلبه  
بالهتّاطه ، كل يوم گاييليله إرجع  
لبلدك .
- يوسف : مو صبحي جاي طالب ، مو مثلنا ، من

يخلص تنتهي علاقته بهل بلد . لكن  
المشكلة شلون يرجع ، إذا رجع يشوون  
على جلده بصل ، وإذا بقى لازم أهله  
يدفعون الكفالة وهُمّه وضعهم مو هالكد .

« تدخل نادية وسعاد » .

سعاد : أقدم إلكم الدكتور نادية !  
« تنطلق الزغاريد وتنهال القبل والعناق على  
نادية » .

أم محمود : مبارك عليح حبيبتني ، الله يهنيح  
ويحقق أحلامج .  
نادية : شكراً خاله ، الله يخليج شكري  
وأبوه . شكراً يا جماعه ، تريدون  
الصدك ، آني ما مصدگة .  
يوسف : يا الله يا الله يا جماعة « يغني » :



دكتور دخل الله ودخلك متداوینه  
دكتور دتجینه الحمى من رجليه  
دكتور داء اللي بينه منا وبينه  
دكتور إسگينه العلكم بش شافينه

الجميع يرددون :

يا ناس مصيبه مصيبتنه  
نسكت تكتلنا علتنه  
نحجي تفضحنه قضيتنه  
بس وين نولي وجهته  
دلينه يا دكتور .

ستار

(٧)

■ ■ بعد ستة أشهر  
« في بيت سعاد ورضا »

عماد : شفّتي سعاد ، ما گلتلج الوضع  
يتبدّل .

سعاد : منو چان یصدگ .

عماد : الواحد لازم يتمسك بهدوءه أعصابه  
وكت المحنة . ، وإلا یرتبك ويتخربط  
عليه البزار ، ورضا ما شاء الله  
أعصابه حديد .

رضا : آني بهالحالات أخلي محنة الآخرين  
گدّامي وأقيس عليها ، ذاك الوكت  
تبين محنتي كلش زغيره ، فأصطبر .

سعاد : والله آني أعصابي تحترگ . منو چان  
یصدگ ينطوك أوراق ، وتلگي شغل  
منتظم .

أم عماد : زين هسته إذا تبدل الوضع ترجعون  
 لو تبقون هنا ؟  
 رضا وسعاد : نرجع !  
 رضا : متگوليلي خاله إحنه شمضيعين هنا ؟  
 أشو العراق بلدنا ، إحنه محتاجيه  
 وهو محتاج إله . گعدتنا هنا كل  
 معنى ما بيها .  
 عماد : والله ريحة التراب هناك تسوه كل  
 عطور أورپا .  
 أم عماد : الله لا يحرمننا منها . أويلي عل  
 ماتوا بالغربة .  
 سعاد : يمه البركة بالباقيين .  
 أم عماد : الله يحفظهم .  
 عماد : سعاد ، يمكن رضا ما گلچ ، تره جبار  
 رجع البغداد .  
 سعاد : لا بالله !  
 عماد : صار شهر تقريباً ، وهسته عبدالله  
 وحمدي هم راح يرجعون .  
 سعاد : عبدالله ليش ؟ مو هو كتل نفسه

ليما حصل إقامة . ثم شلون يگدر  
يرجع للعراق ؟

عماد : ما راح يروح البغداد ، يرجع للشام .  
رضا : والله هذا قرار عجيب .

عماد : يا أخي حالته النفسية تلف . ذاك  
اليوم گعد يبجي ، يگول شلون ؟  
ولدي بدوا ينسون العربي ، آني  
خومو جبتهم دا أنطيهم لهل بلد ،  
زين باچر شلون أريد أتفاهم وياهم ؟  
وإذا رجعنا شلون راح ينسجمون  
ويّه الولد ؟

گتله مو إنته گلبت الدنيا عاجيّه ، ما  
خلّيت باب ما دگيته ، ثم إنته  
متذکر شلون چان وضعکم بالشام ؟  
گلي ما عبالی هالشکل ، کلشي  
چنت حاسب حسابه إلّا مال ولدي  
ميعرفون يحچون ويايه ، هاي ما  
أگدر عليها . أرجع وأتحمل ، عالآقل  
ولدي يعيشون بمحيط عربي .

سعاد : والله محنة .

**رضا :** لا تلومه عماد ، أكو ناس حساسين  
وعواطفهم ملتهبة ، ومن دوخة  
راسهم ما يميزون .

**أم عماد :** لا حول ولا قوة إلا بالله ، هاي وين  
چانت إله .

**عماد :** أمّا حمدي فراجع البغداد .

**سعاد :** زين حمدي شلون ؟ والحزب ؟

**عماد :** ما مشت أموره ، من انسحب  
دكتور جعفر تفرقوا كلهم .

**رضا :** هيّه المسألة چانت مبينه ، حزب  
سياسي ما يُفْتَقَل افتعال ، يضاف إلى  
ذلك ، ما عندهم رصيد شعبي لا  
بالداخل ولا بالخارج .

**عماد :** حزب بدون قواعد شعبية شنو  
قيمته ؟ يعني خو مو يظلون واحد  
يباوع بوجه الالاح ، ويصدرون  
بيانات .

**رضا :** والله آني أعتقد زين سوّوا ما أعلنوه ،  
وإلاّ چان صاروا سالفة .

**عماد :** مو هيّه صارت موده ، بس يختلفون

اثنين ينشقون وكل واحد يؤلف له  
حزب جديد ، وعلى هالرتة .

رضا : دكتور جعفر ذبّ إلهم خوش  
حچايه ، گال إلهم إلهم تتفق على كل  
التفاصيل من البداية ونشتغل بحيل  
صدر ، وإلهم تتكتر ، مسألة الحد  
الأدنى ما مقبولة .

عماد : تره هذي رؤية مثقف ، السياسي  
عنده حسابات أخرى ، لازم يخلي  
هامش للمرونة ، وهالمرونة ضرورية  
وخطرة بنفس الوقت ، لأن متدري  
شراح تجرّ .

رضا : خصوصاً إذا كانت بوسط خبرته  
السياسية لا شيء .

عماد : والله آني أعتبرها بعثرة جهود . عدنا  
أحزاب سياسية إلهما تاريخ وتجارب  
نضالية وحضور شعبي بالداخل  
والخارج ، ليش ما يساندوها  
ويطورون عملها ، ما أدري .

رضا : أكو مستجدات وتغيرات مستمرة .

بعض الأحزاب التحجبي عنها مدتلك  
تتعامل مع هذي المستجدات ، والوضع  
مثل متشوف يوميه بيه خضه .

**عماد :** مو هذي أحزاب إلها برامج واضحة  
وخبرة طويلة .

**رضا :** ميخالف . لكن لتنسه هالتمزقات  
وتعدد الأحزاب الصغيرة ، يريك  
عمل الأحزاب عندها برامج  
وتجارب . أضف إلى ذلك أن بعض  
الأحزاب القديمة استهلكت وانتهى  
دورها ، ثم شنو المانع من قيام  
أحزاب جديدة بروحية عصرية  
ومنطلق وطني نظيف ؟

**سعاد :** إلخاطر الله ما دختوا من السياسة ؟  
دجيبولنا غير سالفه .

**عماد :** يله ، خل نكلب ورقة .

**أم عماد :** صدك والله يمّه ، سگمتونه  
بالأحزاب والسياسة .

**عماد :** والله يمّه حقّج ، بس مدتشوفين  
وضعنه شلونه ، صحيح إحنه مو

سياسيين ، بس المسؤولية مو مسؤولية  
السياسيين وحدهم . إحنه هم  
مسؤولين ولازم نعرف شديصير ، خو  
مو نبقي نتفرّج ، ونباوع عالخلوگ ؟

« ظلام تدریجی »



## مقدّم المسرحية :

والله يابه صحيح . تراه آني هم نفسي  
لعبت ، لكن ما أگدر ألومهم . هُمّه وإنتو  
وآني كلنا ضحايا سياسية ، بس لازم  
الواحد يشوف شكوا بالدنيا ، مو راح  
نتعقد ، أعصابنا صارت تنن . هاكم هذا  
المؤلف خطيه كتل نفسه حتّى يونسكم ،  
ما گدر . يگول لك العراقيين ميعرفون غير  
الحزن ، ليش هُمّه واگع بيدهم الفرح  
ويحزنون .

بس آني المحيّرني شي واحد : إذا  
إحنه مهتمّين لهل درجة بالسياسة ،  
والسياسة تاكل وتشرب ويّانه ، تنام  
وتگعد ويّانه ، نعلّق ونحلل ونفسّر  
ونأول ؛ بالبيت بالمخزن بالگهوه بالشارع  
بالمكتب ، وواحدنا مفتّح باللبن ، لعد  
ليش مديطلعون عدنه سياسيين بمستوى  
المحنة ؟

ليش دتفلت الأمور من بين إصابعنه  
مثل الميّ ، ومن تحل الكارثة ننسى الأول

والتالي وواحدنا يظل يفِرّ بإذانه ؟

ليش

ليش

ليش ؟ ؟

« النهاية »

پاریس فی ۳۰/۳/۱۹۹۵

# سهرة كاس عراقية

١٩٩٢



أبو سمير ☐

أبو علاء ☒

الزمان : بعد حرب الخليج

المكان : بغداد



- والله وقبر النبي ، وداعت عيالي
- نعم !
- كل ما أگوله صحيح وراسچ الغالي
- حلو !
- گلبي گبل ما شفت وجهچ تره خالي
- ليش هوّ من هسّه خالي ؟ من يوم الشيفته وشافني عل هالحطّه .
- دِسْمَغ .
- تفضل .
- أشرقتِ كالفجر في ديجور آمالي
- هاي وين رِحِتْ ، أشو صارت قريض ؟
- دِسْمَغ ، هذا ملَمَّغ .
- يا ملَمَّغ ، هذا مُزْنَجِر للغشِر .
- دخِّليني أَكْمَلْ ، وبعدين عَلِّقْ .
- بعدين أَعلِّقْ ، وين أَعلِّقْ ؟

« وَلْتَعْلَقْ أَنْتِ يَا طَيْرًا مُهَاجِرٌ » ، كُلْهُنَّ  
عَلَّقُوا ، بَسْ أَنِّي وَهَالُوجُهُ الْمَاصِخِ  
ظَلِيلِنَه بِهَالِزَاغُور .

« هَلْكَ وَيْنِ بِيُو اللَّكُورُ »

أَخْذُوا الْجِيتْرِي وَعَلَّكُو

■ هَسَّهْ إِنْتِ وَيْنِ وَدَيْتِنَه بِهَالْتِدَاعِيَاتِ

مَالْتِك . ثَرِيد تِسْمَعْ لَوْ لَا ؟

□ أَسْمَعْ أَسْمَعْ . هَاكَ شَوِيَّهْ لِبَلْبِي ،

أَشُو إِنْتِ مَدَتَاكُلْ ؟

■ أَكَلْ ، مُو مَمْنُوعْ عَلَيَّ . . . هَا يَابَه :

أَشْرَقْتِ كَالْفَجْرِ فِي دِيَجُورِ آمَالِي

وَصَرْتِ وَحِيِي الَّذِي يَهْتَاجُ أَفْكَارِي

□ صَدُكْ هَا الْحُجِّي يَحْتَاجُ تَلْمِيغْ . . .

مُشْكَلِّي هَا الْجَوَاهِرِ إِلْمَنْ ؟

■ هَاي لِفِيلْسُوفِ الْبَصْرَةِ .

□ لَا !

■ إي وداغْتَك .

□ منو ، الخليل ؟

■ يا خليل أبو سمير ، ليش  
الخليل فيلسوف ؟!

□ لَعَدْ مِنْو ، الجاحظ ؟

■ لا يابه لا . هذا فيلسوف معاصر .

□ عابتْ هالمعاصرُ . . . والله لو أَلْغَفْه  
أَعْضَرَه عَضْرَه أَطْلَعْ دِهْنَه . . . . .  
هذ . . . . . معاصر .

مَثْغَلِّي إِنْتَ لِيْشْ إِنْتَدَرْمُكْ أَشْعَارْكَ  
الْحَلُوهْ بِهَالْمَلْخِيَّاتْ ؟!

■ كل شي بَوَكْتَه . . نوبه هيچ ونوبه  
هيچ . . خو مو كلها جديّات .

□ جديّات ، بيبيّات . . .

بيبيّتي الله يرحمها ويرحم والديك ،  
چانتْ تَشَوْرَشَغْ جِدي ، وَتَنْصُبْله  
جُمْبُشْ إلى أَنْ تُلْعَبْ نَفْسَه ، فياخذ

عباته ويشلغ للكهوه ، بس رِجله تصير  
عالعِثبه ، ترجع هيّ ادّك اصيغتين ،  
وتهزّ حتف .

■ إنت هم رحت خط مائل . متكلي إنت  
ليش ضايح . . . تريد أكمل لو أكلب  
صفحة ؟

□ لا لا ، كمل ، دنشوف النتيجة .

■ أفترّحت بالمحطه ، وأشرب بهالتين

□ حلو !

دخن جگاره غازي في وقفة واجتياز  
وجاز نصحي بشكر إن كنت ممن يجازي

■ ومن كثر قهري تره افادي غده هالمين  
□ أجاد . . أجاد . عيده بالله عيده .

■ ومن كثر قهري تره افادي غده هالمين  
□ إي ؟



- تالي سألَت الكلب ، ثاري الكلب مفتتين
- لا على بختك ، هاي من يمتته مفتتين ؟
- لعدّ ليش متكلي إذا جنابك واگغ بالحلب ؟
- وكنّت قبلّ اللقا أرنو لصاحده
- أووووو ، هم رجغنه .
- تعطر اللحن في أنغام قيثاري
- أسألك بالله هذا حچي مال فيلسوف ؟
- لعدّ إحنه ليش دئكرمه ، ونخمّسها إله ؟
- وهذا منين عُرفته ؟
- ما أعرفه .
- عجائب ! لعدّ ليش مدوّخ راسك بيه ؟
- آني سامع عنه . چان بوكتته ماخذنه
- شراع ومجداف ، من قريت له
- هالمُعَلّقة بالجريدة ، گلته والله هاذي
- مَتِثْفَوْتُ ، خرطُ من هالنمونه مو كل
- وكت يوگع بالايذ ، حتى أخونا ناظم

غيطان ميطلغ هالطلعات .

□ أف . . أف . . أف . . هذا شجابه

ببالك ؟ صَدَقَه لَهْلَبِجِم لا تنغصن عليه  
هالگعده الحلوه . ناوشني الجِدّاحه  
من يَمَّك ، تره أفادي غده هالمِتِن .

■ تفضّل . . هَسَه فِكرك ، نكمّل لو لع ؟

□ بعدُ بيها ؟

■ قُفْل واحد .

□ جيبه !

■ لما شِفِت چاره ماكو والاجدام ثَعِبَن

وَرَجَعِتْ وبدربي شفتچ گلت إي والحَسَن

□ أنه اخوك . . لِكْفها !

■ هاذي التسلّي الكلب من ضييجته والمِحَن

□ كافي . . فدوه ارواح لك . . لترجع

عالفيلسوف .

■ مو لازم . . كاسك !

□ چیزز؟

■ اليوم أعوف الفلسفه

واشرب عَرگ عصریه

وانعل أبو الویسکی

وابو مُسیح ، وابو اللاطیه

□ اللاطیه منین هاذي ؟

■ ما سامع بیها ؟

□ لا وداعتک . شنو هاذي هَم عَرک ؟

■ لا ، هذي چَرزات من انتاج ضرورات  
القافية .

□ نعله على وجدانک . . يعني إنت ، والله

العظیم ، مِنْ يَتَفَل بِحَلْگك شیطان  
الشعر ، تخلي الفرزدق بجيبك .

■ يَمْعَوْد هاذي كلها سفاهات ، من تجي  
نسوگها بَتَبِنها ، المهم ما نعطل  
اللعب .

□ لا أبو علاء ، حَشَاكَ . إِنْتَ مَشْعَطُّ  
اللَّعِيبِ ، هَذَا صَحِيحٌ ، بَسْ سَوَالْفَكَ  
موزونه ، وحقايتك نابته مثل البسمار .

■ بسمار حَبَّكَ زَرْفُ جَبْدِ الْوَلْفِ وَأَمْعَطُهُ

□ أُوَيْلِي يَاب !

■ مِنْ بَعْدُ عِزَّهُ غِدَهُ يَسْأَلُ الْوَادِمَ عَطَا

□ مَعَ الْأَسْفِ .

■ يَا حَيْفَ صَرْنَا سَوَالْفَ لَامَ حَسَنٍ وَامَ عَطَا

□ مَالِكَ أَبُو علاء ، مَالِكَ . هَذَا الْحِجِّي .

■ هَذَا الْحِجِّي يَكُولُ تَاجَ الرَّاسِ أَبُو سَمْرِهِ

□ تَسْلَمَ يَا وَرِدَ . هَايَ عَلَيْهَا مَصَّةً ، بِصَحْتِكَ !

■ تَسْلَمُ . . . هَا يَابَهُ .

□ نَعَمْ .

■ نَخْلُ السَّمَاءِ صِيرَتْ مِنْ طَرَّتِهِ سَمْرِهِ

ظَلَّيْتُ اصْصِيحْ بَوْرَاهَا التَّفْتِي يَا سَمْرَه  
□ أَحْسَنْتُ ، لَا فُضَّ فُوك . بِس الْقُفْل  
مَنِين رَاح تَجِييه ؟

■ الْقُفْل مَوْجُود ، وَالْمِفْتَاح ظَلَّيْمٌ عَطَا  
□ نَعْلُهُ عَلَى نَجَابَتِهِ لَعَطَا . . . . لَكَ هَذَا  
شَلُون قَفْل حَايْدَرِي ؟!



□ شَاهِدْنَا يَا أَبُو عِلَاء ، الْوَنَسَهُ مَوْ  
بِالْعَرَّكَ ، وَلَا بِالْبَارَاتِ الْجَمِيلَةِ ، وَلَا  
بِالْحَدَائِقِ الْعَنَاءِ . الْوَنَسَهُ بِالْنَدِيمِ . إِنَّهُ  
كَلْنَا كَاتِلْنَا الْقَهَّارَ ، لَكِنْ ذَاكَ مِنْ ذَاكَ

اللي وكته يساعده وينطيه صديق مثلك .  
أدب ومعشر وأريحته . والله كل غعده  
وياك تسوه ملك الدنيا . . . بصحتك .

■ تِسْلَمُ أَبُو سَمِير . تره آني هَمْ مزاجي  
نَحْسُ . مو عبالك وين ما أَكْعِد  
انسجم . مرات أَشْرَبْ وِيه جماعه يسوون  
العَرَكْ زَقُومْ . يعني هُمّه مو موخوش  
ناس ، لا ، بس ما عندهم شَمْرَة سَمَر .

□ على راسي . . . حچايتك هاي على  
راسي . شمره . . . فعلاً شمره :

شمره . . . . . شمره . . . . .

حبيبي ماخِذْ مِنْ الرِّيمِ شمره

■ مَالِك ، ابو سمير ، مَالِك .

□ شمره . . . . .

شُمرني وكل عذول اِشْتِمِتْ . . .

يا يابّه . . .

بي . . . . . ييه . . . . .

إِحِم . . . إَحِم . . . إَحِمُ . لا  
ما كوفايده ، أشو حِسِي  
طَبَّگ . . . عبالك بالغ خاولي .

■ لا تاكل جاجيك .

□ الجاجيك شَغليه ، آني صاير قراضه .

■ هَمْ يَأْثُر ، الخيار طبيعته باردة ، وإنتَ  
عَزْگان .

□ يَمْعود هذا العرگ يَنْفُض الأكو والماكو .

■ تمام . بس يسوِي شحطه بالزردوم .

□ يوسف عمر ما چان يُبَدِّعْ إلّا لما يُقْنَدِل .

■ بس هوَ چان يشرب حتى يقندِل مثل  
متگول ، مو حتى يصفّي صوته .

□ تره يوسف عمر ماكو منّه .

■ ليش الغبَنچي قليل ؟

□ حاشا . . هذا أستاذ . . آني من أسمع  
يقره أتعلم ، ومن أسمع يوسف عمر أبچي .

■ صوته بيه حَبِّيّه أكثر .

□ رحم الله والديك . . . .

آه . . . .

« ألقاه بالشكوى وأسكت هيبه »

وأقول إن عدنا فسوف أقولُ »

موهاذي تَسَلِّتْ خيوط الغلب  
سَلِّتْ . وشرف محمد ما سمعتها إلا  
حَسَّيت بگلبي يَدَمي . لو أگدر  
ابچي ، چان نُصَبِتْ چاينه ، بس  
الدمعه متنزل . عَلَوْا لو تنزل  
وَتَنَفَّه عني .

■ دمعي صعبُ ولسفاهات النذل ما جرى

□ إي والله .

■ والنار جوّه الحشا يا خِلْتي ماجره

□ مَوَجَّرَه . . . نعم .

■ الجسم عندي ، وروحي عندهم ما جره



- إيجار دائمي .
- ودموع عيني بتصاريف الزمن ماجن
- شلون موج يابه !
- أيام چنت انتظر أفراحهن ماجن
- إمممم .
- يالتسأل شلون هذا المبتلي ما جنّ
- إيييي .
- لا بد يجيني وكت وأحپيلكم ما جرى
- أحسنت . . أحسنت ، لمن هذه الجواهر ؟
- للمنبر .
- تعيش يا ابو علاء ، گدها والتّعِم .
- گّلي خو مو يظل على خاطرك إذا كلت لك  
المسجّل مفتوح ؟
- بشرفك ؟
- وعيونك ابو علاء ، تره إنت متدري

شكد آني متولّع بأشعارك ، واعرف من  
نكعد سوه تطلع منك فلتات تسوه  
الكون . أگعد ثاني يوم أسمعها وأنقلها  
بدفتر ، لأن أدري بيك ترتجل  
وتنسه . وهاك هذا الدفتر وشوف جنباك  
شمبدّع !

■ صدگ چذب . . . لك هذا بي أشعار  
تكسر الظهر .

□ شفت مولانا ، هذا ضمير الناس  
الشرفاء . مو حرام ينسي .

■ بس هذا يوديني سبعة گاصر .

□ أخذه ، ضمه عندك ، آني حافظه على  
صدري . حتى الأشرطة ضاملك اياها ،  
وتگدر تاخذها .

■ لا على بختك ابو سمير ، سري  
سرك ، وانت سرك غميچ ، خليها  
يمك .

□ والله آني محافظ عليها مثل مَيِّ عيني .  
 لأن هاذي مو مُلكي وملكك ، ولو إنتَ  
 صاحبها ، لكن هاذي ملك الناس ،  
 تراثهم ، شاهدهم . يجي يوم الناس  
 تعرف قيمتها ، وقيمتنا من خلالها .  
 أما هالزمن الوسخ فباچر يصير  
 سوالف ، وما يبقه منه غير هالآثار  
 الجميلة . بصحتك .

■ بصحتك . لكن فعلاً هاذي التفاته  
 حضارية ! معقوله كل هالحجي مالي ؟ هذا  
 يطلع ديوان .

□ موهيَّ هاي المشكله . تعرف شگد أكو  
 أشعار حلوه نايه عليها الطابوگه ، لو  
 تجمعها تصير مجلدات ، تكشف لك  
 الأكومالماكو . بس احنه طايح  
 حظنه ، تارकिन هالتراث الثمين  
 وملتهين بالطگطوگیات .

■ الناس هم حقها يا ابو سمير ، هذي

ينراد الها خلگ . ليش عبالک واحد  
يکفي . ينراد الها متفرغين ،  
وهذوله منين تجيبهم ؟

□ أويلاخ لوبيّه حيل . . . لو أرجع  
شباب . . . أنذر حياتي لجمع  
هالشوارد . . . ما عليّ بالأشعار  
المعروفه ، أدور وين ماكو فلتّه . بس  
احنه مثل ما گال ابو العلاء :

کم أردنا ذاك الزمان بمدح  
فشغلنا بدم هذا الزمان

■ أشکو إليك يا أخي من زمن  
صرنا به نُحكم بالقنادر  
من سارق من فمنا لقمتنا  
وخارج من جزمة العساكر

□ لَک . . لَک . . لَک . شفت مولانا ،  
هذا مو حرام يضيع . لمن بالله هذا ؟

■ هذا لشاعر معاصر من صدك ، مو  
مثل صاحبه الفيلسوف .

□ منو بالله ؟

■ .....

□ ما معقوله .

■ ليش ما معقوله ؟

□ لأن هذا شاعر جاد .

■ هذا منتهى الجد . هذا مو هزل ،  
هاذي سخرية تفطر الغلب .

□ مو هذا الدنگوله . لك يا آخي والله  
العظيم آني براسي فكرة ، تريد تصدّك  
تريد تجذب . هذا العراق بلد حضاره ،  
ما طالع من بير نفط ، ولا مدندل  
بهليوكوپتر ، هاذي حضاره راسخه ، لو تمر  
عليها كل زوابع الدنيه متشلعها من  
الگاع . إنت عبالك هاخرب راح تمسح  
العراق . ليش هو مكتوب بالطباشير .

گول تمسح جیل ، تمسح جیلین .  
فدوه . باچر یطلع مثل الثَّیْل ،  
هذا عرگ توٲ . هاڏي حضاره .

■ أشو هم خشیت بالحدادخانه ،  
ورجعتنه عالسیاسه !

□ أنعل أبو السیاسه ، إحنه دنحچی  
عالحضارة . بلد هاڏي حضارته ،  
ما ینخاف علیه . خاف علی ذوله  
الجایین هپی بیاض .

■ عَفیه عراقیین ، ما عندکم غیر  
هالسالفه . گعدة سُر تصیر سیاسه ،  
گعدة شعر تتحول إلی سیاسه ، حتی  
إذا واحدهم رگص هجَع ، هم لازم علی  
إیقاع سیاسی ، موییزی عاد .

□ دا گول لك هاڏي مو سیاسه ، هاڏي  
هموم حضاریه .

■ مو کافی هموم یا ابو سمیر . أشو  
من فکینه عیوٲه إلی أن الله راح یاخذ

أمانته ، ما عدنه غير هالهوموم .

□ هذا الموجود . . . هذا طبع . إنت تگدر

تغير طبعك . أشو إنت دتفلسف

براسي ، عبالك إنت مو من هالنمونه .

ليش متبدل طبعك وتخلصنا ؟

■ والله لو أگدر ما چان قصرت ، بس

شوآغع بيدي .

□ ليش متگدر ، أحد جابرك ؟

■ لع !

□ لعد شدنحچي . مو هالكعك من

هالعجين . صحتك !

پاریس ۱۹۹۲/۳/۱





# داس طاولي ٤

١٩٩٥

الشخص : :

■ أبو ناصر - كاسب

□ أستاذ جبار - موظف متعلم

\* محمود - مدرس

المكان : بغداد

الزمان : قبل حرب الخليج



(۱)

أبو المثل ما خلّه شي ما گاله .

شلون يابه ؟

يگول :

إذا كان الدماغ دماغ سِرّ

فلا ضربُ يفيد ولا عتابُ

هل مثل منين جِبته ؟

أبويه چان يگوله

وال (سِرّ) هاي شنو معناها ؟

ما أدري ، أبويه چان هيچي يقراه

شوف ، سِرّ ما بيها كل معنى

دا آگولك أبويه چان هيچي يقراه

شخبصتنه بأبوك ، يعني قابل هوّ الجواهري

ليش الجواهري أحسن من أبويه ؟

مو قضية أحسن ومو أحسن ، ما كو واحد

أحسن من اللاخ ، بس دا شوف هل (سِرّ)

ما بيها معنى ، وأبوك الله يرحمه .

هَسّه يا چلمه ردي بمكانچ ، ردنه نايد

كلامك ، گمت تتفلسف براسنه ،

- إلعب يابه إلعب . ☐
- ألعب ، وزين ألعب ، اليوم أكلبك عالبطانه ، أسويك سينما ، مو عبالك مثل البارحه . ☐
- شبعنا من هالأسطوانه ، إنت ما بيك غير النفخ ، لو مبدالك بَعْدُ ما ألزم زار لو تقوم الساعه . ☐
- إسكت أعجمي ، إنت مال لِعِبْ ، أخذتلك مالص گلَبت الدنيا . ☐
- بشرفك هوّ هذا تسميه مالص ؟ ☐
- لعد شَسَمِيه ؟ ☐
- هَسَه لا تطولها ، شتحب تلعب ؛ ☐
- محبوس ، گلَبَهَار ، واحد وتلاثين ؟ ☐
- إنت اختار ، الروح روحك ، وشلون تريد طلّعا . ☐
- زين ، ٣١ . ☐
- تعال يا شيش ! ☐
- يستحي يجي يَمَك . ☐
- هَمْ زين بُقّه آخَد يستحي . ☐
- دجيب الزار أبويه ، وهذا ال . . جهار ودو ، ☐
- هذا أول جسر . ☐

- هذا جسر المسيّب ، دستريح .
- صدگ ، ما گلتلك ، البارحه محمود جا من المسيّب .
- هوّ كل وكت يروح ويجي .
- لا ، هالمرة جاي يطلب نقل لبغداد .
- مو گاعد هناك ومرتاح ، عlish جاي عل هل قَدَّعَه ؟ هذوله متصورين العاصمة قَدْ أَبَّهه .
- أوگف أوگف ، وهاذي الخانه ، هَمّ راحتك فدوه . دا أَشْتَمَ ريحة عَطَاب!
- دِلْعَبْ أَمِّي ، هذي أعصابك احترگت .
- أَغَاتِي إِنْتَ ، أعصابي فدوه إلك ، وهذا قفل اللاخ ، وانسدّت دروب اللعب قَدْ سَدَّه .
- والله يابه جايب چنص .
- چنص شنو ؟ هذا لِعِبْ . أَگول ، لو تَذِبْ الزار مو أحسن ؟
- ليش دا أذب الزار ، إحنه دنلعب لو دنلعب ؟
- د ذِيّه عزيزي ، گَبُلْ ما أدزك بِجایش للمسيّب بدل محمود .
- زين عيني زين ، آني أروح أجيب البيرة .
- دگعد هسته ، قابل راح تطير البيرة .

- ☐ مو أخاف تگول مو حَقَّاني .  
☒ لا يابه لا ، إنت أكبر حَقَّاني . نرجع على  
 سالفه محمود .  
☐ متگللي شبيه کاتل نفسه عالنقل ، مو  
 المسيّب شمرة عصا من بغداد . أشو أهله  
 هناك مِن قالوا بلى ، وعائلته معروفه ، وهَوَّ  
 وَلَد دافي .  
☒ ولهذا يريد يبتعد .  
☐ مدا أفتهم .  
☒ مديرهم شاد وياه ، وديضايقه هوايه ، يريده  
 يضب الحبل على بعض الناس ، ومحمود ولد  
 نجيب ، ما عنده تفرقه .  
☐ ومنين هالمدير ؟  
☒ جاي نقل من خانقين .  
☐ زين ما حاول يتفاهم وياه ؟  
☒ ويا من يتفاهم ، ذاك نفسه حامضه ، جاي  
 حادّ سنونه عليهم ، عبالك المسيّب راح تقود  
 ثورة .  
☐ لو يگدر يتحمّل شوّيه ، منّا ليما الله  
 يفرجها .

- يا أخي ليش هو بس المدير ، كلها جايّه  
تطلب ثار .
- طبيعي ، إذا السمچه جايّفه من راسها .
- رحم الله والديك ، أبو المثل ما خله شي ما  
گاله .
- النوب شگال ؟
- گال :
- إذا جافت الأسماك من يَمّ رأسها  
فقل يا مساعينا عليك سلامُ
- والله يا أخي إنتَ أمثالك تشكّ الكلب ،  
متگلي منين تجيبها .
- أبويه چان يگولها .
- صار معلوم .

(٢)

- عادي ، محبوس ، كُلبَهار ، واحد وتلاثين ؟  
■ كَلِّي إنتَ ما تَمَلّ من الطاولي ؟ ليش منلعب  
دومنه ، شطرنج ، ورق ؟  
□ الطاولي أحسن .  
■ غريبه ، واحد مثلك عل هالشقافه ، لازم  
يلعب شطرنج .  
□ هاذي نظرية متعجبني . عندي نظريتي  
باللعب .  
■ أگدر أعرفها ؟  
□ هيّ مو نظريه ، تگدر تگول وجهة نظر .  
الدومنه والورق والشطرنج ألعاب حسابيّه ،  
يعني إنتَ تفكر وتَحسِب وتتصرّف . المفاجأة  
اللي بيها مو بيدك ، بيد الكبالك . في حين  
الطاولي ، المفاجأة لا بيدك ولا بيد الكبالك ،  
بيد الزار ، بيد القَدَر . ينگلب الزار ، يگلب  
لك الطابگ طبگ .  
■ مو هوّ هذا المعجبني ، إنتَ المثقف ، تسلّم  
لحيتك بيد القَدَر والمفاجآت ؟



- ما أسلم لحيتي ، أني أتصارع وبه القَدَر ،  
أدري ما أگدر عليه ، بس أريد أواجهه ،  
وأتعلم شلون أتصرف بالمفاجآت .
- الطاولي بيه فلسفه ، الزار بيه معاني ما  
موجودة بغير لعبه .
- الفلسفة افتهمنا منها الصراع وبه القدر ،  
الزار شنو معناه ؟
- ها ، دتشوفه الهل زار الزغیر ؟  
■ إي ، دا شوفه .
- هذا مثال للحقيقة ، إذا دققنا النظر بيه ،  
واقتهمناه ، كل مشاكله تنحل .
- يعمود گول غيرها .  
□ مثل ما أگلك .
- إنت رايح هوايه بعيد .  
□ لا أبداً . شوف . الحقيقة مثل الزار ، بيها  
عدة وجوه ، ويمكن تكون كلها صحيحة .  
■ إنت تشوف الزار وگدامك الشش ، وتگول :  
هذا شش ، وإنت مُحِقّ . وآني أشوف نفس  
الزار من الجهة الثانية وأگول : هذا يَكّ ، آني  
هَمْ مُحِقّ . وإذا إجه محمود وباع عليه من  
فوك ، راح يشوف سي . والزار نفس الزار .

- إي ، وهاي شنو بيها ؟
- بيها احترام للحقيقه . إذا إحنه خليينه الزار  
ببالنا ، وتذكرنه وجوهه ، راح نتساهل إذا  
اختلفنا ويّه بعضنا . يعني راح نكدر نكول  
يمكن فلان ديشوف الكباله ، يعني مو  
بالضرورة غلطان ، وما يحتاج نسفّه رأيّه  
ونتهمه بالتجاوز على الحقيقة .
- بس مو كل الحقائق مثل الزار . يعني إذا  
آني دا أشوف الأسود أسود ، شلون تريدني  
أكول أبيض ؟
- هاي غير حساب . آني ما أكر أسمى  
الجريدي بعير ، ولو أكوناس بهل وكنت  
يسمّون الجريدي بعير ، والأرنب سبغ ،  
والهزيمة انتصار ، إلى آخره . هذا مو  
قصدي ، قصدي أن ننطي فرصة لمراجعة  
الحقائق المخبوءة . إحنه منكدر نشوف كل  
وجوه الحقيقة مثل ما نشوف الأبيض والأسود  
والجريدي والبعير ، ولذلك ملازم نثعنت  
بآرائنا ، ونعتبرها هيّه وبس !
- آني إذا أشوف الشي بعيني ، ما أكر  
أنكره .

□ ملازم تنكره . بس لازم تنطيني فرصه اعتبر  
عن رأيي ، يمكن آني أشوفه غير شكل .  
■ هاي لو على حسابك چان ما وصلنه الهل  
بيير .

□ لعد ليش دا اگول لك . مو إحنه دگنا  
ومد گوگنا عل هالخبصه . ناخذ الخيط من  
أول حچايه ونطير بيه . لك يابه دئطوا فكّه ،  
خلونه نشوف دربنا ، شوفوا الموضوع يسوه  
هالدوخه راس ، يسوه نُحَبِّثُ ويه الناس على  
مود حچايه طايفه يمكن كل أساس ما إلها ؟  
■ بس إنتَ إلمنْ تَصْلُحْ ، عليمنْ تِلْحَكْ ،  
والدنيا مثل متگول ماخذه الخيط وطايره  
بييه .

□ مو هذا المخلّينه نضرب بَطَنَاش مثل لوريات  
تَلّ محمد ، ونبقه نكلّي بليّه دهن .  
■ بس يرحمه لأبوك ، إذا إنتَ من الزار تطلع  
هالفلسفه ، بس متگللي شتطلع من الكتب  
والمتاحف ؟

□ مو شرط المتحف ينطيك أحسن ، المهم إنتَ  
شلون تشوف .  
■ ثمَ إنتَ متشوف وقتك الدتصرفه باللعب ،

ديروح حرامات ؟ □  
ليش حرامات ، هذا تنفيس . لو مو هالكعده  
وياك ، وتعال يا زار ، وروح أعجمي ، چان  
روحي طلعت من زمان .

(٣)

شسويت ؟ ■

شگدر أسوي بعد ، وگع الفاس بالراس . □

يعني فكرك ، يروح البيت بوله بشط ؟ ■

روحتهم . قابل آني أحسن من الراحة □

بيوتهم ؟

هسته البيت فدوه إلك ، الله يخلِف ويثلف ، ■

بس ميصير ، إنت صاحب عائلة ، وعليك

مسؤوليه ، ثم إنت لا ماكل ولاشارب ،

تروح بدربك وتجي بدربك . بس هذا مو

إنصاف ، شوفلك چاره ، إستشير محامي .

شيسوي المحامي ؟ □

يدليك على درب ، هو يعرف القوانين . ■

وشنو هي القوانين ؟ القوانين أوراق ، تصفها □

وحده فوگ اللخ ، وتجلدها ، وتخليها

بالمكتبه للزينه . حتى وكت الحاجه محتاج

تراجعها ؛ تجر ورقه جديده وتسويها

قانون . وأحياناً محتاج حتى ورقه ، بالتلفون .

- يعني مو من الواجب يگولولك شنو السبب .  
 أشو لا طالع عليه گص ، لا مشتريته  
 الحكومة للمصلحه العامه ، لا إنت مديون  
 إلهم ، شنو هيه فرطنه ؟
- أشو إنت عبالك جاي من المريخ ، مدتشف  
 شديصير . آني أريد أسوي حقل دواجن ،  
 وبيتك واگفلي عاثوره ، يعني أَبْطَلْ؟!
- يعني هيچي بهالبساطه ، عينك عينك !  
 □ هذا الحاصل . الأخ يريد يبني نادي ليلي  
 على آخر طراز بصف بيتنا ، فاشترى البيوت  
 الداير مدايره بقرش ونص .
- وهاي كلها يبنيا نادي ؟  
 □ لا ، هاذي يسكنون بيها الحَبْرَبَشِيَه .
- يا أخي روح منّا منّا ، إحچي ، خلي عل  
 الأقل ينطيك تعويض منصف .
- ويا من أحچي ؟  
 ■ ويّه أبو الحقل ، أبو النادي ، شمدريني .
- بيا لغة أحچي وياه ؟  
 ■ شنو بيا لغة ، خو هو مو ألماني .
- يعني شتريدني أگول له ؟ هذا مو أصول ،  
 مو إنصاف ، خلي الله بين عيونك ؟ هذي لغة

انقرضت ، إذا أحجّوها يضحكون عليّ . لغة  
هل وكت ما بيها مثاليات ، ما بيها أخلاق .  
إحجي باللغة ليفهموها .

ما أعرف . مصطلحاتهم تختلف . آني لغتي  
مال العهد البائد . راحت هيّ وأهلها . لا هُمّة  
يفتهومون حجيي ، ولا آني أفتهم حجيهم .  
إنتَ هم متفتهم حجيهم . ليش عبالك راح  
يخجلون ، يرفّ إلهم حاجب ؟ إحنه ناس  
دننقرض شويّه شويّه ؛ إحنه ولغتنا وسلوكنا  
ومثالياتنا . اللغة الجديدة مولغة كتب

وأخلاقيات ، لغة عمل ، لغة مصالح . وإحنه  
مثل ما تعرف ، نبيع ونشتري بدون أوراق  
ولا تواقيع . چلمه وحده كافيه .

النتيجه ؟ راح تبقه مگابلني وگاعد ؟  
والله يا أخي ما أدري . هاي أول مرّه أشوف  
بيها نفسي بهيجي محنه . آني مكسّر

گحوف الدنيا على راسي ، بس هيچي گحف  
جبار ما شايف . هسته لو التعويض بي مونه  
چان اشتريت لي بيت طين وانچبيت بيه ،  
بس المبلغ الراح ينطيني إياه هوّ والماکو سوه .  
آني ميحتاج اگولك ، بيتي بيتك ، الخطيّة

برگبتك ، شوكت متریده حاضر ، شگد  
مترید إبقه بیه ، إلی أن تشوف دربك ،

ومثل ما گال أبو المثل :

تَصَبَّرَ إلی أنْ یَفْرَجَ الله محنة

وتخرجَ منها بالتي هي أحسنُ

ها . . ها . . ها . . إنت متجاوز من



سوالفك ، إحنه دننضرب چالایق ، وإنت

تضربنا بهالأمثال . وعیونك ، بدون

متگللی ، آنی ما حاسبك إلا أخ حقیقی ،

وأكثر من أخ ، والله العظیم .

الله یعزك . دگوم عاد دناخذ داس .



ترید الصدگ ، ما عندي مزاج .



أدری ، حَقَّك . گوم نروح للکھوه نبذل



جو . گعدتك هنا ما راح تحل المشكله ،

بالعكس ، تحتصر أكثر . یاالله گوم .



(٤)

● ● في المقهى

النادل : تفضل چايك أبو ناصر ؛ چايك أستاذ  
جبار . چاياتكم واصله من الأستاذ . . .

■ منو؟

النادل : الأخ الكاعد يَمْ الأوجاغ .

□ هذا محمود .

■ إي والله ، تدري دَبَّوْه بالمحمودية .

□ يعني صار إسم على مسمَى !

يأتي محمود \*

\* السلام عليكم .

■ □ عليكم السلام ، يا هله بابو شكر .

تفضل استريح .

\* شكراً . شلون الكيف أبو ناصر ؟

■ بخير ، الله يسلمك .

- \* وإنتَ أستاذ جبار ، شلون كيفك ، شصار من موضوع البيت ؟
- على حطة إيدك . إنتَ شلون وضعك بالمحمودية ؟
- \* بعد ما ميين ، خلوني مدرّس .
- هاذي خو مو تأثر عالترفيّع ، مِنْ مدير إلی مدرّس ؟
- قانوناً لا ، بس . . .
- \* يعمود مو زين حصّلت . حتى لو حاطيني فراش همّ أقبل ، مو أحسن لي . ثمّ آني ترفيعي واگف من سنتين .
- كل شي واگف بهالبلد ، بس حظنه نايم .
- والله ، أبو المثل ما خله شي ما گاله .
- جيب يابه دنشوف النوب شگال .
- يگول :
- تنام حظوظ المبدعين بموطني ويرتع فيه كلُّ من هبَّ أو دبّا
- بس لتگول هذا للرصافي .
- لا لا ، هذا من نظم الوالد .
- \* شنو الوالد ينظم شعر ؟
- يعني . . . هل يجي على خاطره يگوله .

- لعد هالأمثال الورمتنه بيها ، كلها من  
إبداعه ؟
- إي نعم .
- \* لعد ليش إنت ما ماخذ شمرته ؟
- يمعود ، إحنه بدون شعر گوه مگزرينها .
- \* يا أخي چان ويانه مدرّس بالمسيّب ، ماكو  
مناسبة أو دالغه ثمرْ عالبال ، إذا مينظم  
عليها شعر بوقتھا . چان مسويلك المدرسة  
مهرجان المرید .
- صحيح ، أكو ناس عندهم قابليات عجيبه .
- يا أخي مو دنگول ، هالبلد كله مواهب  
وكفاءات . هاك هذا منعم فرات ، شلون  
تمائيل يسوي ، يمكن بالعالم كله ماكو  
منها ، وهوّ لا يقره ولا يكتب .
- تساهل شوّيه . شمديك بالعالم كله ماكو  
منها .
- نوري الراوي يگول .
- نوري ما گال هيچي .
- مو إنت حچيتليّھا .
- آني ما گلت لك هيچي گال نوري . گلت لك  
كتب عنه مقالات وگال هذا فنان فطري  
مهم .

- الحاصل ، يعني موهوب .
- \* بیش تخرج المواهب يا أبو ناصر ، عوافي  
 عل يجيب نقش .
- اليجيب نقش تره هَم موهوب ، وإلا مچان  
 يجيب نقش !
- فعلاً .
- بس أكو فرق بين فنان موهوب ، وكلاوچي  
 موهوب .
- تمام . زين موهبتي بالطاولي بيا خانه  
 تحطها ؟
- أحطها بخانة الشوادي . إنت تريد تخسر  
 ومتدري شلون . بس آني ما راح أَثَقَّ لك .  
 خلي نلعب دومنه اليوم ، حتى محمود  
 يشاركنه .
- \* آزنيف .
- الآزنيف ينلعب زوجي ، وإحنه تلاته .
- نلعب طيره .
- إي ، هاي تمام .

(٥)

## ● ● يوم آخر في المقهى

- من ضيغ صدري تمنى خاطري فَرُ طاوُ .
- أوْگف . . أوْگف . . گبل ما أذب الزار ،
- لازم أعرف هل (فَرُ طاوُ) شنو من شي .
- ممنون . .
- تعرف أبويه من لوايب الطاولي .
- طبعاً . . هالشبل من ذاك الأسد .
- لكن ما چان يگول (داس طاولي) ، چان يگول (فَرُ طاولي) .
- صحيح . أكو ناس يگولون (فر طاولي) .
- فهوَّ علي سبيل الإختصار والفكاهة ، چان يسميه (فَرُ طاوُ) .
- منّا وغازد إحنا همّ نسّميه (فر طاو) ليش لع!
- وعنده موّال يجيب بيه هالچلّمة .
- افتهمت . يعني إذا ماكو مَثَل للوالد ، أكو موّال .

■ إي نعم .

يگول :

مِنْ ضَيْجِ صَدْرِي تَمَنَّى خَاطِرِي فَرُّ طَاوٍ  
أَلْعَبَ وَأَسْلَى النَّفْسَ وَاتَهَنَّا بِالْفَرُّطَاوِ  
كَلِمَا أَلِمَ الْفَرْحَ أَهْلَ الْعَذْلِ فَرُّطَاوٍ  
يعني (فرطوه) .

■ مفهوم . □

دو شیش جانی رِکِضْ بس القَدَرِ خانہ  
وانسَدَّتْ البُوبُ کلہا وما بقت خانہ  
میتُ أَلْفَا یا حیف مِنِّي راحتِ الخانہ  
طاوینِ فَرْنِ گبل والنوبِ هَمْ فَرُّ طَاوٍ

□ واللہ یابہ علی راسی . یعنی أبوک اللہ یحفظہ  
یطلع موسوعۃ .

■ لیش ہیہ بس ہالمواویل والأمثال ؟ واللہ إذا  
جِدَخْ براسہ الپیک ، یسویلک الگعدہ  
مہرجان أدبی وفنی وغنائی ، وجیب لیل  
وأخذ عتابہ .

□ واللہ حسافہ علی ہالزمن . ہالمدارس  
والکلیات والروح وتعال ، کلہا مدتطلع  
راس . الناس بالاول لا تقرہ ولا تکتب ، بس

تشوفلك واحدهم ياكل الطّفه . ماكو  
موضوع ينفّتح إذا ميدخلون بيه : سياسة ،  
شعر ، أنساب ، أخبار ، تاريخ ، نوادر ،  
وشمترید . وهسه تشوف دكتورهم حجي  
ميعرف يحجي .

صدگ متگلي شنو السبب . أشو معلوماتهم  
بالمدراس أكثر ، والكتب إنته گول ، ومع  
ذلك حجيهم فاهي .

عزیزی ، بالأول الناس چانت تتعلم من  
الگهوه ، من المجالس ، من القرايات .  
وچانوا يحفظون ؛ بس يسمع حچایه أو  
نادرة ، أو خبر ؛ يروح يلبلبه وينقله  
بأسلوب جمیل ، عبالک هوّ المكتشفه . وإنته  
تگول عالكتب ؛ الكتب تعلّم ، بس جيب  
رجال اليقره .

أکو هوايه ناس يقرون .

صحيح ، بس ميعرفون يحچون . الكلام  
فن . الكتب تنطیک معلومات ، بس غير  
يكون لازم إنته تعرف شلون تحچيها . بالأول  
چانت العلاقات أقوى . .

وبفضل هالعلاقات چان يصير ردّة وبذلّ .

□ رحم الله والديك . هالمناقشات هي التجسّر الواحد وتخليه يحجي ويتعلم .

■ بس يرحمه الأبوك ، متكلي منو اللي هسه يگدر يفك حلگه . إذا الخال يفتن على ابن أخته ، يا گهوه يا حجي ، إذا كل شي ممنوع .

□ تمام . هذا الواقع . لو مو هالرقابة وهالخوف ، چان اختلفت الامور فعلاً . بس الكلام يبقی فن ، مو كل واحد يگدر عليه .

■ الله يستر من الباقي .

□ يا باقي ؟ هو بقی شي ما شفناه .

ألف رحمه على روحه العبد الرحيم ابن الإخوة البغدادي اللي يگول :

وخيرُ عمري الذي ولّى وقد ولّعتْ

■ به الهموم ، فكيف الظنُّ بالباقي

ها . . . ها . . . ها . . . هسه إنته گمت تضرب أمثال .

□ إي خو مو كلها إلك ، يا أبو ناصر !



## ● ● في بيت الأستاذ جبار

- شفّتهم الأنذال شلون دگوها بمحمود ؟ ☒  
 والله يا أبو ناصر ، آني چنت حاس ☐  
 بالمسألة ، وچنت خايف عليه ، بس  
 شتسوئي ، الرجال صاحب مبدأ .  
 هسته لو يگولون هوّ وين ؛ مو خطيه ذوله ☒  
 أهله تصرّغوا .  
 ليش همّ ياخذوا حتى ديگولو لك وين ؟ ☐  
 بس يا أخي هاي ما صايره . ☒  
 هسته دتصير . ☐  
 شلون يعني ؟ ☒  
 أخي أكو تأسيس جديد ، مو لازم تقيس ☐  
 هاي بغيرها ، لتصير مثل جماعتنا ، هادي  
 أمور ما إلها سوابق ، إحنه ملازم نطل  
 نكرر ، شلون وشلون ، لازم نفك عيونه ، مو  
 كل شي نقيسه بگال فلان وگال فلان ،

هاذي متآذي إلى نتيجة . أكو شي ديصير ما  
إله مثيل ، وإحنه لازم نعرف شديجري گدام  
عيوننا ، ونحسب على أساسه . وإلا نضل  
نگلي بليّه دهن .

لعد الجماعة مديحسون ؟ ■

لتخششني بها الجماعة وذيج الجماعة ، آني  
مدا أتهم أحد ، بس دا أگول الأمور  
التدجيري ما إلها مثيل ، ومينفع وياها  
القياس ، إحنه لازم نقيس بالموجود ، هذا  
كل ما هنالك .

زين وآخرها ؟ ■

ما أريد أرجع ليوره وأگول آخرها جاي من  
أولها ؛ هاذي متنتهي . لو بينه خير نعرف  
شلون نتصرف هسه .

هسه گلي إنت شتگدر تسوي . ■

أخويه ؛ آني مثلك ، لا رجل سياسة ولا  
أفتهم شلون تنحلّ ، بس آني وإنتّ حالنا  
حال الملايين ، بس تطگ الطگاکه نصير  
فدائيين ، أما شلون ، وشلازم نسوي ، فما  
عندي جواب .

وشمدريك لحيتنا وين راح تنشدّ . ■

□ لازم نشدها بضمائرنّا . إحنه هم نگدر  
نمیز . هالتاریخ والتجارب لیش ما إلها  
حوبة .

■ لیش الجماعة ما عندهم تاریخ وتجارب ؟  
□ هم ردینا عا الجماعة . یا حبیبی آنی مداگول  
ما عندهم . لكن القبض شنو ؟  
■ بس همّه ما مقصرین .

□ لا حول ولا قوة إلا بالله . محدّ گال  
مقصرین ، لكن هذا طاولي مفتوح گدامك  
وجاك دو شیش ، جیب رجال الیلعبه بشکل  
صحیح ویغلب .

پاریس / شباط ۱۹۹۵




## المحتوى

٧	محنة محمود الشاهد
٣٩	يا غريب إذ كر هلك
١٠٩	سهرة كاس عراقية
١٣١	داس طاولي

## صدر المؤلف :

- ☐ أمطار - شعر ، مطبعة الرابطة ، بغداد ١٩٦٢
- ☐ برتقالة في سؤرة الماء - شعر ، دار الآداب ، بيروت ، ١٩٦٨ .
- ☐ سحرة كاس عراقية - قصص قصيرة ، المركز العربي للفنون والآداب ، بروكسل ١٩٩٤ .
- ☐ أمطار من الكلمات - شعر بالفرنسية ، ترجمة عدنان محسن ، دار آرماتان ، باريس ١٩٩٥
- ☐ أيام عبد الحق البغدادي - أشعار ونصوص أدبية ، دار المدى ، دمشق ١٩٩٥ .
- ☐ الأعمال الشعرية - دار المدى ، دمشق ١٩٩٥ .
- ☐ المجموعة الفنية الأولى - ٩ لوحات خطية مطبوعة بالشبكة الحجرية ، باريس ١٩٨٢
- ☐ المجموعة الفنية الثانية - ٥ لوحات خطية مطبوعة بالشبكة الحجرية ، باريس ١٩٨٤
- ☐ الخط العربي للناشئة - دار الساقى ، لندن ١٩٨٧ .
- ☐ المجموعة الفنية الثالثة - ١٣ لوحة خطية مطبوعة بالأوفست - هامبورك ١٩٨٧ .
- ☐ حروف الصغار الطباعية (ثلاث مجموعات تحتوي على ١٧ نمطاً من حروف الكمبيوتر) ، إصدار ديوان العلوم وتقنية المعلومات ، لندن ١٩٩٣ و١٩٩٤ .





726  
S  
a

Biblioteca Alexandrina

non serve a nulla  
il pubblico è tutto



0258230

SBN => 2-84305-080-4  
EAN => 9782843050800